

# বীরঙ্গনা কাব্য

## প্রথম সর্গ

### দুশ্মন্তের প্রতি শকুন্তলা

। শকুন্তলা বিশ্বামিত্রের ঔরসে ও মেনকানারী অঙ্গরার গর্ভে জন্মগ্রহণ করিয়া, জনক জননী কর্তৃক শৈশবাবস্থায় পরিত্যক্ত হওয়াতে, কথমুণি তাঁহাকে প্রতিপালন করেন। একদা মুনিবরের অনুপস্থিতিতে রাজা দুশ্মন্ত মৃগয়াশ্রমে গিয়া আশ্রমে প্রবেশ করিলে, শকুন্তলা রাজ-অভিধির যথাবিধি অভিধি-সংকার সম্পন্ন করিয়াছিলেন। রাজা দুশ্মন্ত, শকুন্তলার অসাধারণ রূপলাবণ্যে বিমোহিত হইয়া এবং তিনি যে ক্ষত্রকুলোদ্ভবা, এই কথা শুনিয়া, তাঁহার প্রতি প্রেমাশ্রমে গমন করে রাজা তাঁহাকে শুণ্ডভাবে গাঙ্করবিধানে পরিণয় করিয়া স্বদেশে প্রত্যাগমন করেন। রাজা দুশ্মন্ত, স্বরাজ্যে গমনানন্তর, শকুন্তলার কোন তত্ত্বাবধান না করাতে, শকুন্তলা রাজসমীপে এই নিম্নলিখিত পত্রিকাখানি প্রেরণ করিয়াছিলেন।]

বন-নিবাসিনী দাসী নমে রাজপদে,  
গাজেন্দ্র ! যদিও তুমি ভুলিয়াছ তারে,  
ভুলিতে তোমারে কভু পারে কি অভাগী ?

হায়, আশামদে মন্ত আমি পাগলিনী !  
হেরি যদি ধূলারাশি, হে নাথ, আকাশে ;  
পবন-স্বনন যদি শুনি দূর বনে ;  
অমনি চমকি ভাবি,—মদকল করী,  
বিবিধ রতন অঙ্গে, পশিছে আশ্রমে,  
পদাতিক, বাজীরাজী, সুরথ, সারথি,  
কিঙ্কর, কিঙ্করী সহ ! আশার ছলনে,  
প্রিয়স্বদা, অনসূয়া, ডাকি সখীদ্বয়ে ;  
কহি—‘হ্যাদে দেখ, সই, এত দিনে আজি  
স্ময়িলা লো প্রাণেশ্বর এ তাঁর দাসীরে !  
ওই দেখ ধূলারাশি উঠিছে গগনে।  
ওই শোন্ কোলাহল ! পুরবাসী যত  
আসিছে লইতে মোরে নাথের আদেশে !’  
মীরবে ধরিয়া গলা কাঁদে প্রিয়স্বদা ;  
কাঁদে অনসূয়া সই বিলাপি বিবাদে।

দ্রুতগতি ধাই আমি সে নিকুঞ্জ-বনে,  
যথায়, হে মহীনাথ, পুঞ্জিনু-প্রথমে  
পদযুগ ; চারি দিকে চাহি ব্যগ্রভাবে।  
দেখি প্রফুল্লিত ফুল, মুকুলিত লতা ;  
শুনি কোকিলের গীত, অলির গুঞ্জর,  
স্রোতোনাদ ; মরমরে পাতাকুল নাচি ;  
কৃহরে কপোত, সুখে বৃক্ষশাখে বসি,  
প্রেমালাপে কপোতীর মুখে মুখ দিয়া।

সুধি গঞ্জি ফুলপুঞ্জ ;—‘রে নিকুঞ্জশোভা,  
কি সাধে হাসিস্ তোরা ? কেন সমীরণে  
বিতরিস্ আজি হেথা পরিমল সুধা ?’  
কহি পিকে,—‘কেন তুমি, পিককুল-পতি,  
এ স্বরভহরী আজি বরিষ এ বনে ?  
কে করে আনন্দধনি নিরানন্দ কালে ?  
মদনের দাস মধু’ ; মধুর অধীনে  
তুমি ; সে মদন মোহে যাঁর রূপ গুণে,  
কি সুখে গাও হে তুমি তাঁহার ঝিরহে ?’  
অলির গুঞ্জর শুনি ভাবি—মৃদু স্বরে  
কাদিছেন বনদেবী দুঃখিনীর দুঃখে !  
শুনি স্রোতোনাদ ভাবি—গম্ভীর নিনাদে  
নিন্দিছেন বনদেব তোমায়, নৃমণি—  
কাঁপি ভয়ে—পাছে তিনি শাপ দেন রোষে।  
কহি পত্রে,—‘শোন, পত্রে ;—সরস দেখিলে  
তোরে, সমীরণ আসি নাচে তোরে লয়ে  
প্রেমামোদে ; কিন্তু যবে শুখাইস্ কালে  
তুই, ঘৃণা করি তোরে তাড়ায় সে দূরে ;—  
তেমতি দাসীরে কি রে ত্যজিলা নৃপতি ?’

মুদি পোড়া আঁখি বসি রসালের তলে ;  
স্রাস্তিমদে মাতি ভাবি পাইব সত্তরে  
পাদপদ্ম। কাঁপে হিয়া দুকদুক করি  
শুনি যদি পদশব্দ ! উল্লাসে উন্মীলি  
নয়ন, বিবাদে কাঁদি হেরি কুরঙ্গীরে।  
গালি দিয়া দূর তারে করি করাঘাতে।  
ডাকি উচ্ছে অলিরাজে ; কহি,—‘ফুলসখে

শিলীমুখ, আসি তুমি আক্রমণ গুঞ্জরি  
এ পোড়া অধর পুনঃ। রক্ষিতে দাসীরে  
সহসা দিবেন দেখা পুরু-কুল-নিধি!'  
কিন্তু বৃথা ডাকি, কান্ত। কি লোভে ধাইবে  
আর মধুলোভী অলি এ মুখ নিরখি,—  
শুখাইলে ফুল, কবে কে আদরে তারে ?

কাঁদিয়া প্রবেশি, প্রভু, সে লতামণ্ডপে,  
যথায়—ভাবিয়া দেখ, পড়ে যদি মনে,  
নরেন্দ্র ; যথায় বসি, প্রেমকুতুহলে,  
লিখিল কমলদলে গীতিকা<sup>২</sup> অভাগী ;—  
যথায় সহসা তুমি প্রবেশি, জুড়ালে  
বিষম বিরহঙ্কাল। পদ্মপর্ণ<sup>৩</sup> নিয়া  
কত যে কি লিখি নিত্য কব তা কেমনে ?  
কভু প্রভঞ্নে কহি কৃতাজলি-পুটে ;—  
উড়ায় লেখন মোর, বায়ুকুলরাজা,  
ফেল রাজ-পদ-তলে যথা রাজালয়ে  
বিরাজেন রাজাসনে রাজকুলমণি।'  
সম্বোধি কুরঙ্গ কভু কহি শূন্যমনে ;—  
মনোরথ-গতি তোরে দিয়াছেন বিধি,  
কুরঙ্গ<sup>৪</sup> ! লেখন লয়ে, যা চলি সত্বরে  
যথায় জীবিতনাথ<sup>৫</sup> ! হায়, মরি আমি  
বিরহে ! শৈশবে তোরে পালিনু যতনে ;  
বাঁচা রে এ পোড়া প্রাণ আজি কৃপা করি !'

আর যে কি কই করে, কি কাজ কহিয়া,  
নরেন্দ্র ? ভাবি দেখ, পড়ে যদি মনে,  
অনসূয়া প্রিয়স্বদা সখীদ্বয় বিনা,  
নাহি জন জানে, হায়, এ বিজন বনে  
অভাগীর দুঃখ-কথা ! এ দুজন যদি  
আসে কাছে, মুছি আঁখি অমনি ; কেন না  
বিবশা দেখিলে মোরে রোষে ঋষিবালা,  
নিন্দে তোমা, হে নরেন্দ্র, মন্দ কথা কয়ে ।  
বজ্রসম অপবাদ বাজে পোড়া বুকে !  
ফাটি অন্তরিত<sup>৬</sup> রাগে—বাক্য নাহি ফোটে ।

আর আর স্থল যত,—কাঁদিয়া কাঁদিয়া  
ভ্রমি সে সকল স্থলে । যে তরুর মূলে  
গন্ধর্কবিবাহঙ্কলে ছলিলে দাসীরে,  
যে নিকুঞ্জ ফুলশয্যা সাজাইয়া সাধে  
সেবিল চরণ দাসী কানন-বাসরে,—

কি ভাব উদয়ে মনে, দেখ মনে ভাবি,  
ধীমান, যখন পশি সে নিকুঞ্জ-ধামে ।—  
হে বিধাতঃ, এই কি রে ছিল তোর মনে ?  
এই কি রে ফলে ফল প্রেমতরু-শাখে ?

এইরূপে ভ্রমি নিত্য আমি অনাথিনী,  
প্রাণনাথ ! ভাগ্যে বৃদ্ধা গৌতমী তাপসী  
পিতৃষুসা<sup>৭</sup>—মনঃ তাঁর রত তপজপে ;  
তা না হলে, সর্বনাশ অবশ্য হইত  
এত দিনে ! নাহি সাধ বাধিতে কবরী  
ফুলরত্নে আর, দেব ! মলিন বাকলে  
আবরি মলিন দেহ ; নাহি অগ্নে রুচি ;  
না জানি কি কহি কারে, হায়, শূন্যমনে !  
বিষাদে নিশ্বাস ছাড়ি, পড়ি ভূমিতলে,  
হারাই সতত জ্ঞান ; চেতন পাইয়া  
মিলি যবে আঁখি, দেখি তোমায় সম্মুখে !  
অমনি পসারি<sup>৮</sup> বাহু ধাই ধরিবারে  
পদযুগ ; না পাইয়া কাঁদি হাহারবে !  
কে কবে, কি পাপে সহি হেন বিড়ম্বনা !  
কি পাপে পীড়েন বিধি, সুধিব তা কারে ?

দয়া করি কভু যদি বিরামদায়িনী  
নিদ্রা, সুকোমল কোলে, দেন স্থান মোরে  
কত যে স্বপনে দেখি কব তা কেমনে ?  
স্বর্ণ-রত্ন-সংঘটিত দেখি অট্টালিকা ;  
দ্বিরদ-রদ-নির্মিত<sup>৯</sup> দুয়ারে দুয়ারী  
দ্বিরদ ; সুবর্ণাসন দেখি স্থানে স্থানে ;  
ফুলশয্যা ; বিদ্যাধরী-গঞ্জিনী কিঙ্করী ;  
কেহ গায়, কেহ নাচে ; যোগায় আনিয়া  
বিবিধ ভূষণ কেহ ; কেহ উপাদেয়  
রাজভোগ ! দেখি মুক্তা মণি রাশি রাশি  
অলকা-সদনে যেন । শুনি বীণা-ধ্বনি ;  
গঙ্কামোদে মাতে মনঃ, নন্দন-কাননে—  
(শুনোছি এ কথা, নাথ, তাত কণ্ঠমুখে)  
নন্দন-কাননান্তরে বসন্তে যেমনি !  
তোমায়, নৃমণি, দেখি স্বর্ণসিংহাসনে !  
শিরোপরি রাজছত্র ; রাজদণ্ড হাতে,  
মণ্ডিত অমূল-রত্নে<sup>১০</sup> ; সসাগরা ধরা,  
রাজকর করে, নত রাজীব-চরণে !  
কত যে জাগিয়া কাঁদি কব তা কাহারে ?

২. গান। এখানে ছন্দাবদ্ধ লিপি। ৩. পদ্মকুলের পাতা। ৪. হরিণ। ৫. প্রাণনাথ। ৬. মনোগত।

৭. পিসিমা। ৮. প্রসারিত করে। ৯. হাতির দাঁত। ১০. অমূল্য।

জানে দাসী, হে নরেন্দ্র, দেবেন্দ্র-সদৃশ  
ঐশ্বর্য্য, মহিমা তব ; অতুল জগতে  
কুল, মান, ধনে, রাজকুলপতি ।  
কিন্তু নাহি লোভে দাসী বিভব ! সেবিবে  
দাসীভাবে পা দুখানি—এই লোভ মনে—  
এই চির-আশা, নাথ, এ পোড়া হৃদয়ে !  
এন-নিবাসিনী আমি, বাকল-বসনা,  
ফলমুলাহারী নিত্য, নিত্য কুশাসনে  
শয়ন ; কি কাজ, প্রভু, রাজসুখ-ভোগে ?  
আকাশে করেন কেলি লয়ে কলাধরে’’  
রোহিণী ; কুমুদী তাঁরে পূজে মর্ত্যতলে !  
কিঙ্করী করিয়া মোরে রাখ রাজপদে !

চির-অভাগিনী আমি ! জনক জননী  
তাজিলা শৈশবে মোরে, না জানি, কি পাপে ?  
পরান্নে বাঁচিল প্রাণ—পরের পালনে !  
এ নব যৌবনে এবে তাজিলা কি তুমি,  
প্রাণপতি ? কোন দোষে, কহ, কাস্ত, শুনি,  
দাসী শকুন্তলা দোষী ও চরণ-যুগে ?

এ মনে যে সুখ-পাখী ছিল বাসা বাঁধি,  
কেন ব্যাধবেশে আসি বধিলে তাহারে,

নরাধিপ ? শুনিয়াছি রথীশ্রেষ্ঠ তুমি,  
বিখ্যাত ভারতক্ষেত্রে ভীম বাহুবলে ;  
কি যশঃ লভিলা, কহ, যশস্বি, বিনাশি—  
অবলা কুলের বালা আমি—সুখ মম !  
আসিবেন তাত কথ ফিরি যবে বনে ;  
কি কব তাঁহারে নাথ, কহ, তা দাসীরে ?  
নিন্দে অনসূয়া যবে মন্দ কথা কয়ে,  
অপবাদে প্রিয়স্বদা তোমায়,—কি বল্যে  
বুঝাবে এ দোঁহে দাসী, কহ তা দাসীরে ?  
কহ, কি বলিয়া, দেব, হায় বুঝাইব  
এ পোড়া পরাণ আমি—এ মিনতি পদে !

বনচর চর, নাথ ! না জানি কিরূপে  
প্রবেশিবে রাজপুরে, রাজ-সভাতলে ?  
কিন্তু মজ্জমান জন, শুনিয়াছি, ধরে  
তুণে, আর কিছু যদি না পায় সম্মুখে !  
জীবনের আশা, হায়, কে ত্যজে সহজে !

ইতি শ্রীবীরাজনাকাব্যে শকুন্তলাপত্রিকা নাম  
প্রথম সর্গ।

## দ্বিতীয় সর্গ

### সোমের প্রতি তারা

। যৎকালে সোমদেব—অর্থাৎ চন্দ্র—বিদ্যাধায়ন করণাভিলাষে দেবগুরু বৃহস্পতির আশ্রমে বাস করেন, গুরুপত্নী তারাদেবী তাঁহার অসামান্য সৌন্দর্য্য সম্পর্শনে বিমোহিতা হইয়া, তাঁহার প্রতি প্রেমাঙ্গু হন । সোমদেব, পাঠ সমাপনান্তে গুরুদক্ষিণা দিয়া বিদায় হইবার বাসনা প্রকাশ করিলে, তারাদেবী আপন মনের ভাব আর প্রচ্ছন্নভাবে রাখিতে পারিলেন না ; ও সতীত্বধর্ম্মে জলাঞ্জলি দিয়া সোমদেবকে এই নিম্নলিখিত পত্রখানি লিখেন । সোমদেব যে এতাদৃশী পত্রিকা পাঠে কি করিয়াছিলেন, এ স্থলে তাহার পরিচয় দিবার কোন প্রয়োজন নাই । পুরাণগ্রন্থ ব্যক্তিমাত্রেই তাহা অবগত আছেন ।]

কি বলিয়া সম্বোধিবে, হে সুধাংশুনিধি,  
তোমারে অভাগী তারা ? গুরুপত্নী আমি  
তোমার, পুরুষরত্ন ; কিন্তু ভাগ্যদোষে,  
ইচ্ছা করে দাসী হয়ে সেবি পা দুখানি !—

কি লজ্জা ! কেমনে তুই, রে পোড়া লেখনি,  
শিখিলি এ পাপ কথা,—হায় রে, কেমনে ?  
কিন্তু বৃথা গঞ্জি তোরে ! হস্তদাসী সদা  
তুই ; মনোদাস হস্ত ; সে মনঃ পুড়িলে

কেন না পুড়িবি তুই ? ব্রজাঙ্গি যদ্যপি  
দহে তরুশিরঃ, মরে পদাশ্রিত লতা !

হে স্মৃতি, কুকর্ম্মে রত দুস্মৃতি যেমতি  
নিবায় প্রদীপ, আজি চাহে নিবাইতে  
তোমায় পাপিনী তারা ! দেহ ভিক্ষা, ভুলি  
কে সে মনঃ—চোর মোর, হায়, কেবা আমি !—  
ভুলি ভূতপূর্ব্ব কথা,—ভুলি ভবিষ্যতে !  
এস তবে, প্রাণসখে ; দিনু জলাঞ্জলি

কুলমানে তব জন্যে,—ধর্ম, লজ্জা, ভয়ে !  
কুলের পিঞ্জর ভাঙ্গি, কুল-বিহঙ্গিনী  
উড়িল পবন-পথে, ধর আসি তারে,  
তারানাথ !<sup>১</sup>— তারানাথ ? কে তোমারে দিল  
এ নাম হে গুণনিধি, কহ তা তারারে !  
এ পোড়া মনের কথা জানিল কি ছলে  
নামদাতা ? ভেবেছিনু, নিশাকালে যথা  
মুদিত-কমল-দলে থাকে গুণুভাবে  
সৌরভ, এ প্রেম, বঁধু, আছিল হৃদয়ে  
অন্তরিত ; কিন্তু—ধিক্, বৃথা চিন্তা, তোরে !  
কে পারে লুকাতে কবে জ্বলন্ত পাবকে ?  
এস তবে, প্রাণসখে ! তারানাথ তুমি ;  
জুড়াও তারার জ্বালা ! নিজ রাজ্য ত্যজি,  
ক্রমে কি বিদেশে রাজা, রাজকাজ তুলি ?  
সদর্পে কন্দর্প নামে মীনধ্বজ রথী<sup>২</sup>,  
পঞ্চ খর শর তুণে, পুষ্পধনুঃ হাতে,  
আক্রমিছে পরাক্রমি অসহায় পুরী ;—  
কে তারে রক্ষিবে, সখে, তুমি না রক্ষিলে ?  
যে দিন,—কুদিন তারা বলিবে কেমনে  
সে দিনে, হে গুণমণি, যে দিন হেরিল  
আঁখি তার চন্দ্রমুখ,—অতুল জগতে !—  
যে দিন প্রথমে তুমি এ শান্ত আশ্রমে  
প্রবেশিলা, নিশাকান্ত, সহসা ফুটিল  
নবকুমুদিনীসম এ পরাণ মম  
উল্লাসে,—ভাসিল যেন আনন্দ-সলিলে !  
এ পোড়া বদন মুহুঃ হেরিনু দর্পণে ;  
বিনাইনু যত্নে বেণী ; তুলি ফুলরাজী,  
(বন-রত্ন) রত্নরূপে পরিনু কুন্তলে !  
চির পরিধান মম বাকল ; ঘৃণিনু  
তাহায় ! চাহিনু, কাঁদি বন-দেবী-পদে,  
দুকূল<sup>৩</sup>, কাঁচলি<sup>৪</sup>, সীতি, কঙ্কণ, কিঙ্কিণী<sup>৫</sup>,  
কুণ্ডল, মুকুতাহার, কাঞ্চী<sup>৬</sup> কটিদেশে !  
ফেলিনু চন্দন দূরে, স্মরি মৃগমদে<sup>৭</sup> !  
হায় রে, অবোধ আমি ! নারিনু বুঝিতে  
সহসা এ সাধ কেন জনমিল মনে ?  
কিন্তু বুঝি এবে, বিধু ! পাইলে মধুরে,  
সোহাগে বিবিধ সাজে সাজে বনরাজী !—  
তারার যৌবন-বন-খতুরাজ তুমি !

বিদ্যালোভ-হেতু যবে বসিতে, সুমতি,  
গুরুপদে ; গৃহকর্ম তুলি পাণীয়সী  
আমি, অন্তরালে বসি শুনিতাম সুখে  
ও মধুর স্বর, সখে, চির-মধু-মাখা !  
কি ছার, নিগম, তন্ত্র, পুরাণের কথা ?  
কি ছার, মুরজ<sup>৮</sup>, বীণা, মুরলী, তুস্কী<sup>৯</sup> ?  
বর্ষ বাক্যসুধা তুমি ! নাচিবে পুলকে  
তারা, মেঘনাদে<sup>১০</sup> মাতি ময়ূরী যেমতি !

গুরুর আদেশে যবে গাভীবন্দ লয়ে,  
দূর বনে, সুরমণি, ভ্রমিতে একাকী  
বহু দিন ; অহরহঃ, বিরহ-দহনে,  
কত যে কাঁদিত তারা, কব তা কাহারে—  
অবিরল অশ্রুজল মুছি লজ্জাভয়ে !

গুরুপত্নী বলি যবে প্রণমিতে পদে,  
সুধানিধি, মুদি আঁখি, ভাবিতাম মনে,  
মানিনী যুবতী আমি, তুমি প্রাণপতি,  
মান-ভঙ্গ-আশে নত দাসীর চরণে !  
আশীর্ব্বাদ-ছলে মনে নমিতাম আমি ।

গুরুর প্রসাদ-অগ্নে সদা ছিলা রত,  
তারাকান্ত ; ভোজনান্তে আচমন-হেতু  
যোগাইতে জল যবে গুরুর আদেশে  
বহির্দ্বারে, কত যে কি রাখিতাম পাতে  
চুরি করি আমি, পড়ে কি হে মনে ?  
হরীতকী-স্থলে, সখে, পাইতে কি কভু  
তাম্বুল শয়নধামে ? কুশাসন-তলে,  
হে বিধু, সুরভি ফুল কভু কি দেখিতে ?  
হায় রে, কাঁদিত প্রাণ হেরি তৃণাসনে ;  
কোমল কমল-নিন্দা ও বরাদ্ধ তব,  
ঠেঁই, ইন্দু, ফুলশয্যা পাতিত দুঃখিনী !  
কত যে উঠিত সাধ, পাড়িতাম যবে  
শয়ন, এ পোড়া মনে, পার কি বুঝিতে ?  
পূজাহেতু ফুলজাল তুলিবারে যবে  
প্রবেশিতে ফুলবনে, পাইতে চৌদিকে  
তোলা ফুল । হাসি তুমি কহিতে, সুমতি  
“দয়াময়ী বনদেবী, ফুল অবচয়ি<sup>১১</sup>”,  
রেখেছেন নিবারিতে পরিশ্রম মম !”  
কিন্তু সত্য কথা এবে কহি, গুণনিধি ;  
নিশীথে ত্যজিয়া শয্যা পশিত কাননে

১. চন্দ্র । তারা বা নক্ষত্রদের পতিস্বরূপ । ২. কামদেব । কামদেবের রথের পতাকা মৎস্যচিহ্ন লাক্ষিত । ৩. রেশমী কাপড় । ৪. বক্ষবন্ধন । ৫. নুপুর । ৬. মেখলা । ৭. মৃগকে মত্ত করে যা—কম্বুরী । ৮. মৃদঙ্গ । ৯. একতারা । ১০. মেঘের গর্জনে । ১১. চয়ন করে ।

এ কিঙ্করী ; ফুলরাশি তুলি চারি দিকে  
রাখিত তোমার জন্যে ! নীর-বিন্দু যত  
দেখিতে কুসুমদলে, হে সুধাংশু-নিধি,  
অভাগীর অশ্রুবিন্দু—কহিনু তোমারে !  
কত যে কহিত তারা—হায়, পাগলিনী !—  
প্রতি ফুলে, কেমনে তা আনিব এ মুখে ?  
কহিত সে চম্পকেরে,—“বর্ণ তোর হেরি,  
রে ফুল, সাদরে তোরে তুলিবেন যবে  
ও কর-কমলে, সখা, কহিসু তাঁহারে,—  
‘এ বর বরণ মম কালি অভিমানে  
হেরি যে বর বরণ, হে রোহিণীপতি,  
কালি সে বর বরণ তোমার বিহনে’ !”  
কহিত সে কদম্বেরে,—না পারি কহিতে  
কি যে সে কহিত তারে, হে সোম, শরমে !—  
রসের সাগর তুমি, ভাষি দেখ মনে !

শুনি লোকমুখে, সখে, চম্পলোকে তুমি  
ধর মৃগশিশু কোলে, কত মৃগশিশু  
ধরেছি যে কোলে আমি কাঁদিয়া বিরলে,  
কি আর কহিব তার ? শুনিলে হাসিবে,  
হে সুহাসি ! নাহি জ্ঞান, না জানি কি লিখি !  
ফাটিত এ পোড়া প্রাণ হেরি তারাদলে !

ডাকিতাম মেঘদলে চির আবারিতে  
রোহিণীর স্বর্ণকান্তি। ভ্রান্তিমদে মাতি,  
সপত্নী বলিয়া তারে গঞ্জিতাম রোষে !  
প্রফুল্ল কুমুদে হৃদে হেরি নিশাযোগে  
তুলি ছিড়িতাম রাগে ;—আঁধার কুটীরে  
পশিতাম বেগে হেরি সরসীর পাশে  
তোমায় ! ভূতলে পড়ি, তিতি অশ্রুজলে,  
কহিতাম অভিমানে,—‘রে দারুণ বিধি,  
নাহি কি যৌবন মোর,—রূপের মাধুরী ?  
তবে কেন,—’ কিন্তু বৃথা স্মরি পূর্বকথা !  
নিবেদিব, দেবশ্রেষ্ঠ, দিন দেহ যবে ।

তুবেছ গুরুর মনঃ সুদক্ষিণা-দানে ;  
গুরুপত্নী চাহে ভিক্ষা,—দেহ ভিক্ষা তারে !  
দেহ ভিক্ষা—ছয়ারূপে থাকি তব সাথে  
দিবা নিশি ! দিবা নিশি সেবি দাসীভাবে  
ও পদযুগল, নাথ,—হা ধিক, কি পাপে,  
হায় রে, কি পাপে, বিধি, এ তাপ লিখিলি  
এ ভালে ? জনম মম মহা ঋষিকূলে,

তবু চণ্ডালিনী আমি ? ফলিল কি এবে  
পরিমলাকর<sup>১২</sup> ফুলে, হায়, হলাহল ?  
কোকিলের নীড়ে কি রে রাখিলি গোপনে  
কাকশিশু ? কৰ্মনাশা—পাপ-প্রবাহিণী !—  
কেমনে পড়িল বহি জাহ্নবীর জলে ?

ক্ষম, সখে !—পোষা পাখী, পিঞ্জর খুলিলে,  
চাহে পুনঃ পশিবারে পূর্ব কারাগারে !  
এস তুমি ; এস শীঘ্র ! যাব কুঞ্জ-বনে,  
তুমি, হে বিহঙ্গরাজ, তুমি সঙ্গে নিলে !  
দেহ পদাশ্রয় আসি,—প্রেম-উদাসিনী  
আমি ! যথা যাও যাব, করিব যা কর ;—  
বিকাইব কায় মনঃ তব রাঙা পায়ে !

কলঙ্কী শশাঙ্ক, তোমা বলে সর্ব্ব জনে।  
কর আসি কলঙ্কিনী কিঙ্করী তারারে,  
তারানাথ ! নাহি কাজ বৃথা কুলমানে।  
এস, হে তারার বাঙ্গা ! গোড়ে বিরহিণী,  
পোড়ে যথা বনস্থলী ঘোর দাবানলে !  
চকোরী সেবিলে তোমা দেহ সুধা তারে,  
সুধাময়<sup>১৩</sup> ; কোন্ দোষে দোষী তব পদে  
অভাগিনী ? কুমুদিনী কোন্ তপোবলে  
পায় তোমা নিত্য, কহ ? আরক্তি সত্বরে  
সে তপঃ, আহার নিদ্রা ত্যজি একাসনে !  
কিন্তু যদি থাকে দয়া, এস শীঘ্র করি !  
এ নব যৌবন, বিধু, অর্পিব গোপনে  
তোমায়, গোপনে যথা অর্পেন আনিয়া  
সিন্ধুপদে মন্দাকিনী স্বর্ণ, হীরা মণি !

আর কি লিখিবে দাসী ? সুপণ্ডিত তুমি,  
ক্ষণ ভ্রম ; ক্ষম দোষ ! কেমনে পড়িব  
কি কহিল পোড়া মনঃ, হায়, কি লিখিল  
লেখনী ? আইস, নাথ, এ মিনতি পদে ।  
লিখিনু লেখন বসি একাকিনী বনে,  
কাঁপি ভয়ে—কাঁদি খেদে—মরিয়া শরমে !  
লায়ে ফুলবৃন্ত, কান্ত, নয়ন-কাজলে  
লিখিনু ! ক্ষমিও দোষ, দয়াসিন্ধু তুমি !  
আইলে দাসীর পাশে, বুঝিব ক্ষমিলে  
দোষ তার, তারানাথ ! কি আর কহিব ?  
জীবন মরণ মম আজি তব হাতে !

ইতি শ্রীবীরাঙ্গনাকাব্যে তারাপত্রিকা নাম  
দ্বিতীয় সর্গ।

## তৃতীয় সর্গ

### দ্বারকানাথের প্রতি রুক্মিণী

[বিদর্ভাধিপতি ভীষ্মকরাজপুত্রী রুক্মিণী দেবীকে পৌরাণিক ইতিবৃত্তে স্বয়ং লক্ষ্মী-অবতার বলিয়া ব্যাখ্যা করিয়া থাকেন। সুতরাং তিনি আজন্ম বিষ্ণুপরায়ণা ছিলেন। যৌবনাবস্থায় তাঁহার ভ্রাতা যুবরাজ রুক্ম চন্দ্রীশ্বর শিশুপালের সহিত তাঁহার পরিণয়ার্থে উদ্যোগী হইলে, রুক্মিণী দেবী নিম্নলিখিত পত্রিকাখানি দ্বারকায় বিষ্ণু-অবতার দ্বারকানাথের সমীপে প্রেরণ করেন। রুক্মিণী-হরণ-বৃত্তান্ত এ স্থলে ব্যক্ত করা বাঞ্ছ্য।]

শুনি নিত্য ঋষিমুখে, হৃষীকেশ তুমি,  
যাদবেন্দ্র, অবতীর্ণ অবনী-মণ্ডলে  
ঋগ্বিতে ধরার ভার দণ্ডি পাপী-জনে,  
চাহে পদাশ্রয়, নমি ও রাজীব-পদে  
রুক্মিণী,—ভীষ্মক-পুত্রী, চিরদাসী তব ;—  
তার, হে তারক, তারে এ বিপত্তি-কালে!

কেমনে মনের কথা কহিব চরণে,  
অবলা কুলের বালা আমি, যদুমণি?  
কি সাহসে বাঁধি বুক, দিব জলাঞ্জলি  
লজ্জাভয়ে? মুদে আঁখি, হে দেব, শরমে ;  
না পারে আঙুল-কুল ধরিতে লেখনী ;  
কাঁপে হিয়া থরথরে। না জানি কি করি ;  
না জানি কাহারে কহি এ দুঃখ-কাহিনী!  
শুন তুমি, দয়াসিদ্ধ! হায়, তোমা বিনা  
নাহি গতি অভাগীর আর এ সংসারে!

নিশার স্বপনে হেরি পুরুষ-রতনে,  
কায় মনঃ অভাগিনী সঁপিয়াছে তাঁরে ;  
দেবে সাক্ষী করি বরি দেবনরোত্তমে  
বরভাবে! নারী দাসী, নারে উচ্চারিতে  
নাম তাঁর, স্বামী তিনি ; কিন্তু কহি, শুন,  
পঞ্চ মুখে পঞ্চমুখ<sup>১</sup> জপেন সতত  
সে নাম,—জগত-কর্ণে সুধার লহরী!

কে যে তিনি? জন্ম তাঁর কোন মহাকূলে?  
অবধান কর, প্রভু, কহিব সংক্ষেপে ;  
তুলিয়া কুসুম-রাশি, মালিনী যেমতি  
গাঁথে মালা, ঋষিমুখ-বাক্যচয় আজি  
গাঁথিব গাথায়, নাথ, দেহ পদ-ছায়।

গৃ-হিলা পুরুষোত্তম জন্ম কারাগারে।<sup>২</sup>—

রাজদেবে পিতা মাতা ছিল বন্দীভাবে,  
দীনবন্ধু, তেঁই জন্ম নাথের কুস্থলে!  
খনিগর্তে ফলে মণি ; মুক্তা শুক্ৰিধামে!  
হাসিলা উল্লাসে পৃথ্বী সে শুভ নিশীথে ;  
শত শরদের শশী-সদৃশী শোভিল  
বিভা। গঙ্ঘামোদে মাতি স্বনিলা সুস্বনে  
সমীরণ ; নদ নদী কলকলকলে  
সিন্ধুপদে সুসংবাদ দিলা দ্রুতগতি ;  
কম্পোলিলা জলপতি গম্ভীর নিনাদে!  
নাচিলা অঙ্গরা স্বর্গে ; মর্ন্ত্যে নর নারী!  
সঙ্গীত-তরঙ্গ রঙ্গে বহিল চৌদিকে!  
বৃষ্টিলা কুসুম দেব ; পাইল দরিদ্র  
রতন ; জীবন পুনঃ জীবন্যু জন!  
পূরিল অখিল বিশ্ব জয় জয় রবে।

জন্মাতে জনমদাতা, ঘোর নিশাযোগে  
গোপরাজ-গৃহে লয়ে রাখিলা নন্দনে  
মহা যত্নে।<sup>৩</sup> মহারত্নে পাইলে যেমতি  
আনন্দ-সলিলে ভাসে দরিদ্র, ভাসিলা  
গোকূলে গোপ-দম্পতি<sup>৪</sup> আনন্দ-সলিলে!

আদরে পালিলা বালে গোপ-কুল-রাণী  
পুত্রভাবে। বাল্য-কালে বাল্য-খেলা যত  
খেলিলা রাখাল-রাজ কে পারে বর্ণিতে?  
কে কবে, কি ছলে শিশু নাশিলা মায়াবী  
পুতনারে? কাল নাগ কালীয়, কি দেখি,  
লইল আশ্রয় নমি পাদ-পদ্ম-তলে?  
কে কবে, বাসব যবে রুধি, বরষিলা  
জলাসার<sup>৫</sup>, কি কৌশলে গোবর্দ্ধনে তুলি,  
রুক্মিলা গোকুল, দেব, প্রলয়-প্লাবনে?

১. পাঁচ মুখ যার—মহাদেব। ২. কৃষ্ণের জন্ম প্রসঙ্গ। ৩. ভাগবতোক্ত কাহিনী—নবজাত কৃষ্ণকে বসুদেব ব্রজধামে গোপরাজ নন্দগোপের গৃহে রেখে এসেছিলেন। ৪. বৃষ্টি ধারা।

আর আর কীর্্তি যত বিদিত জগতে ?\*

যৌবনে করিলা কেলি গোপী-দলে লয়ে  
রসরাজ ; মজাইলা গোপ-বধু-ব্রজ  
বাজায়ে বাঁশরী, নাচি তমালের তলে ।  
বিহারিলা গোষ্ঠে প্রভু ; যমুনা-পুলিনে !<sup>১</sup>  
এইরূপে কত কাল কাটাইলা সুখে  
গোপ-ধামে গুণনিধি ; পরে বিনাশিয়া  
পিড়-অরি<sup>২</sup> অরিন্দম<sup>৩</sup>, দূর সিঙ্কু-তীরে  
স্থাপিলা সুন্দরী পুরী !<sup>৪</sup> আর কব কত ?  
দেখ চিন্তি, চিন্তামণি, চেন যদি তারে !

না পার চিনিতে যদি, দেহ আঙ্কা তবে,  
সীতাম্বর, দেখি যদি পারে হে বর্গিতে  
সে রূপ-মাধুরী দাসী । চিত্রপটে যেন,  
চিত্রিত সে মূর্তি চির, হয়, এ হৃদয়ে ।  
বীন-নীরদ-বর্ণ ; শিখি-পুচ্ছ শিরে ;  
ব্রভঙ্গ ; সুগল-দেশে বরগুঞ্জমালা ;  
ধুর অধরে বাঁশী ; বাস পীত ধড়া<sup>৫</sup> ;  
মজবজ্জাক্ষুশ-চিহ্ন<sup>৬</sup> রাজীব-চরণে—  
যাগীন্দ্র-মানস-পদ্ম ! মোক্ষ-ধাম ভবে !

যত বার হেরি, দেব, আকাশ-মণ্ডলে,  
নবরে, শত্রু-ধনুঃ চূড়ারূপে শিরে ;  
গড়িৎ সুখড়া অঙ্গে ;—পাদ্য অর্ঘ্য দিয়া,  
গাষ্ট্রাঙ্গে প্রণমি, আমি পূজি ভক্তি-ভাবে !  
গাষ্ট্রিমদে মাতি কহি—‘প্রাণকান্ত মম  
মাসিছেন শূন্যপথে তুষিতে দাসীরে !’  
গেড়ে যদি চাতকিনী, গঞ্জি তারে রাগে !  
গাচিলে ময়ূরী, তারে মারি, যদুমণি !  
গম্ভ্রে যদি ঘনবর, ভাবি, আঁখি মুদি,  
গোপ-কুল-বালা আমি ; বেগুর সুরবে  
ডাকিছেন সখা মোরে যমুনা-পুলিনে !  
কহি শিখীবরে,—‘ধন্য তুই পক্ষিকূলে,  
শিখশি<sup>৭</sup> ! শিখশু<sup>৮</sup> তোর মণ্ডে শিরঃ য়ার,  
পূজেন চরণ তাঁর আপনি ধূর্জটি !’—  
আর পরিচয় কত দিব পদযুগে ?

গুন এবে দুঃখ-কথা । হৃদয়-মন্দিরে

স্থাপি সে সুশ্যাম মূর্তি, সন্ন্যাসিনী যথা  
পূজে নিত্য ইষ্টদেবে গহন বিপিনে,  
পূজিতাম আমি নাথে । এবে ভাগ্য-দোষে  
চেদীশ্বর নরপাল শিশুপাল নামে,  
(শুন জনরব) নাকি আসিছেন হেথা  
বরবেশে বরিবারে, হয়, অভাগীরে !

কি লঙ্কা ! ভাবিয়া দেখ, হে দ্বারকাপতি !  
কেমনে অধর্ম কর্ম করিবে রুক্মিণী ?  
স্বৈচ্ছায় দিয়াছে দাসী, হয়, এক জনে  
কায় মনঃ, অন্য জনে—ক্ষম, গুণনিধি !—  
উড়ে প্রাণ, পোড়া কথা পড়ে যবে মনে !  
কি পাপে লিখিলা বিধি এ যাতনা ভালে ?

আইস গরুড় ধ্বজে, পাঞ্চজন্য নাদি,  
গদাধর । রূপ গুণ থাকিত যদ্যপি  
এ দাসীর,—কহিতাম, ‘আইস, মুরারি,  
আইস ; বাহন তব বৈনতেয় যথা  
হরিল অমৃতরস পশি চন্দ্রলোকে,  
হর অভাগীরে তুমি প্রবেশি এ দেশে !’  
কিস্ত নাহি রূপ গুণ ; কোন মুখ দিয়া  
অমৃতের সহ দিব আপন তুলনা !  
দীন আমি ; দীনবন্ধু তুমি, যদুপতি ;  
দেহ লয়ে রুক্মিণীরে সে পুরুষোত্তমে,  
য়ার দাসী করি বিধি সৃজিলা তাহারে !

রুক্ম নামে সহোদর,—দুরন্ত সে অতি ;  
বড় প্রিয়পাত্র তার চেদীশ্বর বলী ;  
শরমে মায়ের পদে নারি নিবেদিতে  
এ পোড়া মনের কথা । চন্দ্রকলা সখী,  
তার গলা ধরি, দেব, কাঁদি দিবানিশি ;—  
নীরবে দুজনে কাঁদি সভয়ে বিরলে  
লইনু শরণ আজি ও রাজীব-পদে ;—  
বিয়-বিনাশন তুমি, ত্রাণ বিঘ্নে মোরে !

কি ছলে ভুলাই মনঃ ; কেমনে যে ধরি  
ধৈর্য, শুনিবে যদি, কহিব, শ্রীপতি !  
বহে প্রবাহিণী এক রাজ-বন-মাঝে ;  
‘যমুনা’ বলিয়া তারে সম্বোধি আদরে,

৬. ব্রজধামে কৃষ্ণের বাল্যলীলার পৌরাণিক প্রসঙ্গ । কবি এখানে পুতনাবধ, কালীয়নাগ দমন, ইন্দ্রপূজা বন্ধ ও গোবর্ধনপর্বত ধারণ প্রভৃতি ঘটনার কথা উল্লেখ করেছেন । ৭. গোপীদের সঙ্গে কৃষ্ণের প্রণয়লীলার প্রসঙ্গ । ৮. কংস । ৯. শত্রুকে যিনি দমন করেন । ১০. দ্বারকা নগরী স্থাপনের প্রসঙ্গ । ১১. ধৃতি । ১২. পৌরাণিক বিশ্বাস মতে বিষ্ণুর এবং তাঁর অবতারদের পদতলে ধ্বজ, বজ্র ও অঙ্কুশচিহ্ন থাকে । ১৩. ময়ূর । ১৪. ময়ূরপুচ্ছ ।

গুণনিধি! কুলে তাঁর কত যে রোপেছি  
তমাল, কদম্ব,—তুমি হাসিবে শুনিলে!  
পুষিয়াছি সারী শুক, ময়ূর ময়ূরী  
কুঞ্জবনে; অলিকুল গুঞ্জরে সতত;  
কুহরে কোকিল ডালে; ফোটে ফুলরাজী।  
কিন্তু শোভাহীন বন প্রভুর বিহনে!  
কহ কুঞ্জবিহারী, হে দ্বারকাপতি,  
আসিতে সে কুঞ্জবনে বেণু বাজাইয়া!  
কিন্মা মোরে লয়ে, দেব, দেহ তাঁর পদে!  
আছে বহু গাভী গোষ্ঠে; নিজ কর দিয়া  
সেবে দাসী তা সবারে। কহ হে রাখালে  
আসিতে সে গোষ্ঠগৃহে, কহ, যদুমণি!  
যতনে চিকণি নিত্য গাঁথি ফুলমালা;  
যতনে কুড়ায়ে রাখি যদি পাই পড়ি

শিখীপুচ্ছ ভূমিতলে;—কত যে কি করি,  
হায়, পাগলিনী আমি! কি কাজ কহিয়া?  
আসি উদ্ধারহ মোরে, ধনুর্ধর তুমি,  
মুরারি! নাশিলা কংসে, শুনিয়াছে দাসী,  
কংসজিত; মধু নামে দৈত-কুল-রথী,  
বধিলা, মধুসূদন, হেলায় তাহারে!  
কে বর্ণিবে গুণ তব, গুণনিধি তুমি?  
কালরূপে শিশুপাল আসিছে সত্বরে;  
আইস তাহার অগ্রে। প্রবেশি এ দেশে,  
হর মোরে! হরে লয়ে দেহ তাঁর পদে,  
হরিলো এ মনঃ যিনি নিশার স্বপনে!

ইতি শ্রীবীরস্নানাকাব্যে রুক্মিণীপত্রিকা নাম  
তৃতীয় সর্গ।

## চতুর্থ সর্গ

### দশরথের প্রতি কেকয়ী

[কোন সময়ে রাজর্ষি দশরথ কেকয়ী দেবীর নিকট এই প্রতিজ্ঞা করিয়াছিলেন যে, তিনি তাঁহার গর্ভজাত-পুত্র ভরতকেই যুবরাজপদে অভিষিক্ত করিবেন। কালক্রমে রাজা স্বসত্য বিশ্ব্রুত হইয়া কৌশল্যা-নন্দন রামচন্দ্রকে সে পদ-প্রদানের ইচ্ছা প্রকাশ করাত্তে, কেকয়ী দেবী মছরা নান্নী দাসীর মুখে এ সংবাদ পাইয়া নিম্নলিখিত পত্রিকাখানি রাজসমীপে প্রেরণ করিয়াছিলেন।]

এ কি কথা শুনি আজ মছরার মুখে,  
রঘুরাজ? কিন্তু দাসী নীচকুলোদ্ভবা,  
সত্য মিথ্যা জ্ঞান তার কত না সম্ভবে!  
কহ তুমি;—কেন আজি পুরবাসী যত  
আনন্দ-সলিলে মগ্ন? ছড়াইছে কেহ  
ফুলরাশি রাজপথে; কেহ বা গাঁথিছে  
মুকুল কুসুম ফল পল্লবের মালা  
সাজাইতে গৃহদ্বার—মহোৎসবে যেন?  
কেন বা উড়িছে ধ্বজ প্রতি গৃহচূড়ে?  
কেন পদাতিক, হয়, গজ, রথ, রথী  
বাহিরিছে রণবেশে? কেন বা বাজিছে  
রণবাদ্য? কেন আজি পুরনারী-ব্রজ'  
মুছমুছ ছলাহলি দিতেছে চৌদিকে?  
কেন বা নাচিছে নট, গাইছে গায়কী?  
কেন এত বীণা-ধ্বনি? কহ, দেব, শুনি,

কৃপা করি কহ মোরে—কোন ব্রতে ব্রতী  
আজি রঘু-কুল-শ্রেষ্ঠ? কহ, হে নুমণি,  
কাহার কুশল-হেতু কৌশল্যা মহিষী  
বিতরেন ধন-জাল? কেন দেবালয়ে  
বাজিছে ঝাঁঝরি, শঙ্খ, ঘণ্টা ঘটোরোলে?  
কেন রঘু-পুরোহিত রত স্বস্ত্যয়নে?  
নিরন্তর জন-স্রোতঃ কেন বা বহিছে  
এ নগর-অভিমুখে? রঘু-কুল-বধু  
বিবিধ ভূষণে আজি কি হেতু সাজিছে—  
কোন রঙ্গে? অকালে কি আরঞ্জিলা, প্রভু,  
যজ্ঞ? কি মঙ্গলোৎসব আজি তব পুরে?  
কোন রিপু হত রণে, রঘু-কুল-রথি?  
জন্মিল কি পুত্র আর? কাহার বিবাহ  
দিবে আজি? আইবড় আছে কি হে গৃহে  
দুহিতা? কৌতুক বড় বাড়িতেছে মনে!



কহ, শুনি হে রাজন ; এ বয়েসে পুনঃ  
পাইলা কি ভাগ্য-বলে—ভাগ্যবান তুমি  
চিরকাল!—পাইলা কি পুনঃ এ বয়েসে—  
রসময়ী নারী-ধনে, কহ, রাজ-ঋষি ?

হা ঋক্ ! কি কবে দাসী—গুরুজন তুমি !  
নতুবা কেকয়ী, দেব, মুক্তকণ্ঠে আজি  
কহিত,—‘অসত্য-বাদী রঘু-কুল-পতি !  
নির্লঙ্ক ! প্রতিজ্ঞা তিনি ভাঙ্গেন সহজে !  
ধর্ম-শব্দ মুখে,—গতি অধর্মের পথে !’

অযথার্থ কথা যদি বাহিরায় মুখে  
কেকয়ীর, মাথা তার কাট তুমি আসি,  
নররাজ ; কিম্বা দিয়া চূণ কালি গালে  
খেদাও গহন বনে ! যথার্থ যদিপি  
অপবাদ, তবে কহ, কেমনে ভূঞ্জিবে°  
এ কলঙ্ক ? লোক-মাঝে কেমনে দেখাবে  
ও মুখ, রাঘবপতি, দেখ ভারি মনে ।

না পড়ি ঢলিয়া আর নিতম্বের ভরে !  
নহে গুরু উরু-দ্বয়, বর্জুল কদলী-  
সদৃশ ! সে কাটি, হায়, কর-পন্থে ধরি  
যাহায়, নিন্দিতে তুমি সিংহে প্রেমাদরে,  
আর নহে সরু, দেব ! নম্র-শিরঃ এবে  
উচ্চ কুচ ! সুখা-হীন অধর ! লইল  
লুটিয়া কুটিল কাল, যৌবন-ভাণ্ডারে  
আছিল রতন যত ; হরিল কাননে  
নিদাঘ কুসুম-কান্তি, নীরসি কুসুমে !

কিন্তু পূর্বকথা এবে স্মর, নরমণি !—  
সেবিনু চরণ যবে তরুণ যৌবনে,  
কি সত্য করিলা, প্রভু, ধর্ম সাক্ষী করি,  
মোর কাছে ? কাম-মদে মাতি যদি তুমি  
বৃথা আশা দিয়া মোরে ছলিলা, তা কহ ;—  
নীরবে এ দুঃখ আমি সহিব তা হলে !  
কামীর কুরীতি এই শুনেছি জগতে,  
অবলার মনঃ চুরি করে সে সতত  
কৌশলে, নির্ভয়ে ধর্ম দিয়া জলাঞ্জলি ;—  
প্রবঞ্চনা-রূপ ভঙ্গ মাঝে মধুরসে ।  
এ কুপথে পথী কি হে সূর্য্য-বংশ-পতি ?  
তুমিও কলঙ্ক-রেখা লেখ সুললাটে,  
(শশাঙ্ক-সদৃশ) এবে, দেব দিনমণি !

ধর্মশীল বলি, দেব, বাখানে তোমারে  
দেব নর,—জিতেপ্রিয় নিত্য সত্যপ্রিয় !

তবে কেন, কহ মোরে, তবে কেন শুনি,  
যুবরাজ-পদে আজি অভিষেক কর  
কৌশল্যা-নন্দন রামে ? কোথা পুত্র তব  
ভরত,—ভারত-রত্ন, রঘু-চূড়ামণি ?  
পড়ে কি হে মনে এবে পূর্বকথা যত ?  
কি দোষে কেকয়ী দাসী দোষী তব পদে ?  
কোন অপরাধে পুত্র, কহ, অপরাধী ?

তিন রাণী তব, রাজা ! এ তিনের মাঝে,  
কি ক্রটি সেবিতে পদ করিল কেকয়ী  
কোন কালে ? পুত্র তব চারি, নরমণি !  
গুণশীলোত্তম রাম, কহ, কোন গুণে ?  
কি কৃহকে, কহ শুনি, কৌশল্যা মহিষী  
ভুলাইলা মনঃ তব ? কি বিশিষ্ট গুণ  
দেখি রামচন্দ্রে, দেব, ধর্ম নষ্ট কর  
অভীষ্ট পূর্ণিতে তার, রঘুশ্রেষ্ঠ তুমি ?

কিন্তু বাক্য-ব্যয় আর কেন অকারণে ?—  
যাহা ইচ্ছা কর, দেব ; কার সাধ্য রোধে  
তোমায়, নরেন্দ্রে তুমি ? কে পারে ফিরাতে  
প্রবাহে ? বিতংসে° কেবা বাঁধে কেশরীরে ?  
চলিল তাজিয়া আজি তব পাপ-পুরী  
ভিখারিণী-বেশে দাসী ! দেশ দেশান্তরে  
ফিরিব ; যেখানে যাব, কহিব সেখানে  
‘পরম অধর্মচারী রঘু-কুল-পতি !’  
গভীরে অন্ধরে যথা নাদে কাদস্বিনী,  
এ মোর দুঃখের কথা, কব সর্ব জনে !  
পথিকে, গৃহস্থে, রাজে, কাঙালে, তাপসে,—  
যেখানে যাহারে পাব, কব তার কাছে—  
‘পরম অধর্মচারী রঘু-কুল-পতি !’  
পৃষি সারী শুক, দৌঁহে শিখাব যতনে  
এ মোর দুঃখের কথা, দিবস রজনী ।  
শিথিলে এ কথা, তবে দিব দৌঁহে ছাড়ি  
অরণ্যে । গাইবে তারা বসি বৃক্ষ-শাখে,  
‘পরম অধর্মচারী রঘু-কুল-পতি !’  
শিথি পক্ষীমুখে গীত গায়ে প্রতিধ্বনি—  
‘পরম অধর্মচারী রঘু-কুল-পতি !’  
লিখিব গাছের ছালে, নিবিড় কাননে,  
‘পরম অধর্মচারী রঘু-কুল-পতি !’  
খোদিব এ কথা আমি তুঙ্গ° শৃঙ্গদেহে ।  
রচি গাথা, শিখাইব পদ্মী-বাল-দলে ।  
করতালি দিয়া তারা গাইবে নাচিয়া—

‘পরম অধর্মচারী রঘু-কুল-পতি!’

থাকে যদি ধর্ম, তুমি অবশ্য ভুঞ্জিবে  
এ কর্মের প্রতিফল! দিয়া আশা মোরে,  
নিরাশ করিলে আজি; দেখিব নয়নে  
তব আশা-বৃক্ষে ফলে কি ফল, নৃমণি?

বাড়ালে যাহার মান, থাক তার সাথে  
গৃহে তুমি! বামদেশে কৌশল্যা মহিষী,—  
(এত যে বয়েস, তবু লঙ্কাহীন তুমি!)—  
যুবরাজ পুত্র রাম; জনক-নন্দিনী  
সীতা প্রিয়তমা বধু;—এ সবারে লয়ে  
কর ঘর, নরবর, যাই চলি আমি!

পিতৃ-মাতৃ-হীন পুত্রে পালিবেন পিতা—  
মাতামহালায়ে পাবে আশ্রয় বাছনি।  
দিব্য দিয়া\* মানা তারে করিব খাইতে  
তব অন্ন; প্রবেশিতে তব পাপ-পুরে।

চিরি বক্ষঃ মনোদুঃখে লিখিনু শোণিতে  
লেখন। না থাকে যদি পাপ এ শরীরে;  
পতি-পদ-গতা যদি পত্তিব্রতা দাসী;  
বিচার করুন ধর্ম ধর্ম-রীতি-মতে!

ইতি শ্রীবীরাক্ষনাকাব্যে কেকয়ীপত্রিকা নাম  
চতুর্থ সর্গ।

## পঞ্চম সর্গ

### লঙ্কণের প্রতি সূর্ণগথা

[যৎকালে রামচন্দ্র পঞ্চবটী-বনে বাস করেন, লঙ্কাধিপতি রাবণের ভগিনী সূর্ণগথা রামানুজের মোহন-রূপে মুগ্ধা হইয়া, তাঁহাকে এই নিম্নলিখিত পত্রিকাখানি লিখিয়াছিলেন। কবিগুরু বাম্পীকি রাজেন্দ্র রাবণের পরিবারবর্গকে প্রায়ই বীভৎস রস দিয়া বর্ণন করিয়া গিয়াছেন; কিন্তু এ স্থলে সে রসের লেশ মাত্রও নাই। অতএব পাঠকবর্গ সেই বাম্পীকিবর্ণিতা বিকটা সূর্ণগথাকে স্মরণপথ হইতে দূরীকৃত করিবেন।]

কে তুমি,—বিজন বনে ভ্রম হে একাকী,  
বিভূতি-ভূষিত অঙ্গ? কি কৌতুকে, কহ,  
বৈশ্বানর, লুকাইছ ভস্মের মাঝারে?  
মেঘের আড়ালে যেন পূর্ণশশী আজি?  
ফাটে বুক জটাজুট হেরি তব শিরে,  
মঞ্জুকেশি! স্বর্ণশয্যা ত্যজি জাগি আমি  
বিরাগে, যখন ভাবি, নিত্য নিশায়োগে  
শয়ন, বরাস্ত তব, হায় রে, ভূতলে!  
উপাদেয় রাজ-ভোগ যোগাইলে দাসী,  
কাঁদি ফিরাইয়া মুখ, পড়ে যবে মনে  
তোমার আহার নিত্য ফল মূল, বলি!  
সুবর্ণ-মন্দিরে পশি নিরানন্দ গতি,  
কেন না—নিবাস তব বঞ্জুল\* মঞ্জুলে!

হে সুন্দর, শীঘ্র আসি কহ মোরে শুনি—  
কোন দুঃখে ভব-সুখে বিমুখ হইলা  
এ নব যৌবনে তুমি? কোন অভিমানে  
রাজবেশ ত্যজিলা হে উদাসীর বেশে?

হেমাঙ্গ মৈনাক-সম, হে তেজস্বি, কহ,  
কার ভয়ে ভ্রম তুমি এ বন-সাগরে  
একাকী, আবারি তেজঃ ক্ষীর্ণ, ক্ষুণ্ণ খেদে?

তোমার মনের কথা কহ আসি মোরে।—  
যদি পারভূত তুমি রিপুর বিক্রমে,  
কহ শীঘ্র; দিব সেনা ভব-বিজয়িনী,  
রথ, গজ, অশ্ব, রথী—অতুল জগতে!  
বৈজয়ন্ত-ধামে নিত্য শচীকান্ত বলী  
ব্রহ্ম অস্ত্র-ভয়ে যার, হেন ভীম রথী  
যুঝিবে তোমার হেতু—আমি আদেশিলে!  
চন্দ্রলোকে, সূর্যালোকে,—যে লোকে ত্রিলোকে  
লুকাইবে অরি তব, বাঁধি আনি তারে  
দিব তব পদে, শূর। চামুণ্ডা আপনি,  
(ইচ্ছা যদি কর তুমি) দাসীর সাধনে,  
(কুলদেবী তিনি, দেব,) ভীমখণ্ড\* হাতে  
ধাইবেন হৃদ্ধকারে নাচিতে সংগ্রামে—  
দেব-দৈত্য-নর-ত্রাস!—যদি অর্থ চাহ,

৬. শপথ করে।

১. বেত। ২. কুঞ্জ। ৩. ডগাঝ খড়্গ।

কহ শীঘ্র ;—অলকার<sup>৪</sup> ভাণ্ডার খুলিব  
তুমিতে তোমার মনঃ ; নতুবা কুহকে  
শুধি রত্নাকরে, লুটি দিব রত্ন-জালে।  
মণিযোনি<sup>৫</sup> খনি যত, দিব হে তোমারে !  
প্রেম-উদাসীন যদি তুমি, গুণমণি,  
কহ, কোন যুবতীর—(আহা, ভাগ্যবতী  
রামাকুলে সে রমণী!)—কহ শীঘ্র করি,—  
কোন যুবতীর নব যৌবনের মধু  
বাঞ্ছা তব ? অনিমিষে<sup>৬</sup> রূপ তার ধরি,  
(কামরূপা<sup>৭</sup> আমি, নাথ,) সেবিব তোমারে !  
আনি পারিজাত ফুল, নিত্য সাজাইব  
শয্যা তব। সঙ্গে মোর সহস্র সঙ্গিনী,  
নৃত্য গীত রঙ্গে রত। অঙ্গরা, কিম্বরী,  
বিদ্যাধরী,—ইন্দ্রাণীর কিঙ্করী যেমতি,  
তেমতি আমারে সেবে দশ শত দাসী।  
সুবর্ণ-নির্মিত গৃহে আমার বসতি—  
মুক্তাময় মাঝ<sup>৮</sup> তার ; সোপান খচিত  
মরকতে ; শুভ্রে হীরা ; পদ্মরাগ মণি ;  
গবাক্ষে দ্বিরদ-রদ, রতন কপাটে !  
সুকল স্বরলহরী উথলে চৌদিকে  
দিবানিধি ; গায় পাখী সুমধুর স্বরে ;  
সুমধুরতর স্বরে গায় বীণাবাণী  
বামাকুল। শত শত কুসুম-কাননে  
লুটি পরিমল, বায়ু অনুক্ষণ বহে।  
খেলে উৎস ; চলে জল কলকল কলে !  
কিন্তু বৃথা এ বর্ণনা। এস, গুণনিধি,  
দেখ আসি,—এ মিনতি দাসীর ও পদে !  
কায়, মনঃ, প্রাণ আমি সঁপিব তোমারে !  
ভূঞ্জ আসি রাজ-ভোগ দাসীর আলয়ে ;  
নহে কহ, প্রাণেশ্বর ! অন্নান বদনে,  
এ বেশ ভূষণ ত্যজি, উদাসিনী-বেশে  
সাজি, পূজি, উদাসীন, পাদ-পদ্ম তব !  
রতন কাঁচলি খুলি, ফেলি তারে দুরে,  
আবরি বাকলে স্তন ; ঘুচাইয়া বেণী,  
মণি জটাভূটে শিরঃ ভুলি রত্নরাজী,  
বিপিন-জনিত ফুলে বাঁধি হে কবরী !  
মুছিয়া চন্দন, লেপি ভস্ম কলেবরে।  
পরি রুদ্রাক্ষের মালা, মুক্তামালা ছিঁড়ি  
গলদেশে ! প্রেম-মস্ত্র দিও কর্ণ-মূলে ;

গুরুর দক্ষিণা-রূপে প্রেম গুরু-পদে  
দিব এ যৌবন-ধন প্রেম-কুতূহলে।  
প্রেমাধীনা নারীকুল ডরে কি হে দিতে  
জলাঞ্জলি, মঞ্জুকেশি, কুল, মান, ধনে  
প্রেমলাভ-লোভে কভু ?—বিরলে লিখিয়া  
লেখন, রাখিনু, সখে, এই তরুতলে।  
নিত্য তোমা হেরি হেথা ; নিত্য ভ্রম তুমি  
এই স্থলে। দেখ চেয়ে ; ওই যে শোভিছে  
শমী,—লতাবৃতা, মরি, ঘোমটায় যেন,  
লজ্জাবতী।—দাঁড়াইয়া উহার আড়ালে,  
গতিহীনা লজ্জাভয়ে, কত যে চেয়েছি  
তব পানে, নরবর—হায় ! সূর্যমুখী  
চাহে যথা স্থির-আঁখি সে সূর্যের পানে !—  
কি আর কহিব তার ? যত ক্ষণ তুমি  
 থাকিতে বসিয়া, নাথ ; থাকিত দাঁড়িয়ে  
প্রেমের নিগড়ে বন্ধা এ তোমার দাসী !  
গেলে তুমি শূন্যাসনে বসিতাম কাঁদি !  
হায় রে, লইয়া ধূলা, সে স্থল হইতে  
যথায় রাখিতে পদ, মাখিতাম ভালে,  
হব্য-ভস্ম<sup>৯</sup>—তপস্বিনী মাখে ভালে যথা !  
কিন্তু বৃথা কহি কথা ! পড়িও, নৃমণি,  
পড়িও এ লিপিখানি, এ মিনতি পদে !  
যদিও ও হৃদয়ে দয়া উদয়ে, যাইও  
গোদাবরী-পূর্বকূলে ; বসিব সেখানে  
মুদিত কুমুদীরূপে আজি সায়ংকালে ;  
তুমিও দাসীরে আসি শশধর-বেশে !  
লয়ে তরি সহচরী থাকিবেক তীরে ;  
সহজে হইবে পার। নিবিড় সে পারে  
কানন, বিজন দেশ। এস, গুণনিধি !  
দেখিব প্রেমের স্বপ্ন জাগি হে দুজনে !  
যদি আঞ্জা দেহ, এবে পরিচয় দিব  
সংক্ষেপে। বিখ্যাত, নাথ, লক্ষা, রক্ষঃপুরী  
স্বর্ণময়ী, রাজা তথা রাজ-কুল-পতি  
রাবণ, ভগিনী তাঁর দাসী ; লোকমুখে  
যদি না শুনিয়া থাক, নাম সুপর্ণখা।  
কত যে বয়েস তার ; কি রূপ বিধাতা  
দিয়াছেন, আশু আসি দেখ, নরমণি।  
আইস মলয়-রূপে ; গন্ধহীন যদি  
এ কুসুম, ফিরে তবে যাইও তখন !

৪. যক্ষরাজ কুবেরের রাজধানী। ৫. মণির উৎপত্তিস্থল। ৬. মুহূর্তে।

৭. যে ইচ্ছামত রূপ ধারণে সক্ষম। ৮. মেঝে। ৯. যজ্ঞের ভস্ম।

আইস ভ্রমর-রূপে ; না যোগায় যদি  
মধু এ যৌবন-ফুল, যাইও উড়িয়া  
গুঞ্জরি বিরাগ-রাগে ! কি আর কহিব ?  
মলয় ভ্রমর, দেব, আসি সাথে দোহে  
বৃন্তাসনে মালতীরে ! এস, সখে, তুমি ;—  
এই নিবেদন করে সুপর্ণখা পদে ।

শুন নিবেদন পুনঃ । এত দূর লিখি  
লেখন, সখীর মুখে শুনিব হরষে,  
রাজরথী দশরথ অযোধ্যাধিপতি,  
পুত্র তুমি, হে কন্দর্প-গর্ব-খর্ব-কারি,  
তাঁহার ; অগ্রজ সহ পশিয়াছ বনে  
পিতৃ-সত্য-রক্ষা-হেতু । কি আশ্চর্য্য ! মরি,—  
বালাই<sup>১০</sup> লইয়া তব, মরি, রঘুমণি,  
দয়ার সাগর তুমি ! তা না হলে কভু  
রাজ্য-ভোগ ত্যজিতে কি ভ্রাতৃ-প্রেম-বশে ?  
দয়ার সাগর তুমি । কর দয়া মোরে,

প্রেম-ভিখারিণী আমি তোমার চরণে !  
চল শীঘ্র যাই দৌঁহে স্বর্ণ লক্ষ্যধামে ।  
সম পাত্র মানি তোমা, পরম আদরে,  
অর্পিবেন শুভ ক্ষণে রক্ষঃ-কুল-পতি  
দাসীরে কমল-পদে । কিনিয়া, নৃমণি,  
অযোধ্যা-সদৃশ রাজ্য শতেক যৌতুকে,  
হবে রাজা ; দাসী-ভাবে সেবিবে এ দাসী !  
এস শীঘ্র, প্রাণেশ্বর ; আর কথা যত  
নিবেদিব পাদ-পদ্মে বসিয়া বিরলে ।  
ক্ষম অশ্রু-চিহ্ন পত্রে ; আনন্দে বহিছে  
অশ্রু-ধারা ! লিখেছে কি বিধাতা এ ভালে  
হেন সুখ, প্রাণসখে ? আসি ত্বরা করি,  
প্রশ্নের উত্তর, নাথ, দেহ এ দাসীরে ।

ইতি শ্রীবীরঙ্গনাকাব্যে সুপর্ণখাপত্রিকা  
নামে পঞ্চম সর্গ ।

## ষষ্ঠ সর্গ

### অর্জুনের প্রতি দ্রৌপদী

[যৎকালে ধর্ম্মরাজ যুধিষ্ঠির পাশক্রীড়ায় পরাজিত ও রাজচ্যুত হইয়া বনে বাস করেন, বীরবর অর্জুন বৈরনির্য্যাতনের নিমিত্ত অস্ত্রশিক্ষার্থ সুরপুরে গমন করিয়াছিলেন । পার্থের বিরহে কাতরা হইয়া, দ্রৌপদী দেবী তাঁহাকে নিম্নলিখিত পত্রিকাখানি এক ঋষিপুত্রের সহযোগে প্রেরণ করিয়াছিলেন ।]

হে ত্রিদশালয়-বাসি<sup>১</sup>, পড়ে কভু মনে  
এ পাপ সংসার আর ? কেন বা পড়িবে ?  
কি অভাব তব, কান্ত, বৈজয়ন্ত-ধামে ?  
দেব-ভোগ-ভোগী তুমি, দেবসভা মাঝে  
আসীন দেবেন্দ্রাসনে ! সতত আদরে  
সেবে তোমা সুরবালা,—পীনপয়োধরা  
ঘৃতাচী ; সু-উরু রক্তা ; নিত্য-প্রভাময়ী  
স্বয়ম্প্রভা ; মিশ্রকেশী—সুকেশিনী ধনী !  
উর্বশী—কলঙ্ক-হীনা শশিকলা দিবে<sup>২</sup> !  
নিবিড়-নিতম্বী সহা সহ চিত্রলেখা  
চরুনেত্রী ; সুমধ্যমা তিলোত্তমা বামা ;  
সুলোচনা সুলোচনা ; কেহ গায় সুখে ;  
কেহ নাচে,—দিব্য বীণা বাজে দিব্য তালে ;

মন্দার-মণ্ডিত বেণী দোলে পৃষ্ঠদেশে !  
কম্পরী কেশর ফুল আনে কেহ সাথে !  
কেহ বা অধর-মধু যোগায় বিরলে,  
সুমৃগাল-ভুজে তোমা; বাঁধি, গুণনিধি !  
রসিক নাগর তুমি ; নিত্য রসবতী  
সুরবালা ;—শত ফুল প্রফুল্ল যে বনে,  
কি সুখে বঞ্চিত, সখে, শিলীমুখ তথা ?  
নন্দন-কাননে তুমি আনন্দে, সুমতি,  
ভ্রম নিত্য ! শুনিয়াছি ঋতুরাজ না কি  
সাজান সে বনরাজী বিরাজি সে বনে  
নিরন্তর ; নিরন্তর গায় পাখী শাখে ;  
না শুখায় ফুলকুল ; মণি মুক্তা হীরা  
স্বর্ণ মরকতে বাঁধা সরোরোধঃ<sup>৩</sup> যত !

মন্দ মন্দ সমীরণ বহে দিবা নিশি  
গন্ধামোদে পুরি দেশ। কিন্তু এ বর্ণনে  
কি কাজ ? শুনেছে দাসী কর্ণে মাত্র যাহা,  
নিত্য স্বনয়নে তুমি দেখ তা, নুমণি !  
স্বশরীরে স্বর্গভোগ। কার ভাগ্য হেন  
তোমা বিনা, ভাগ্যবান, এ ভব-মণ্ডলে ?  
ধন্য নর-কূলে তুমি ! ধন্য পুণ্য তব !

পড়িলে এ সব কথা মনে, শূরমণি,  
কেমনে ভাবিব, হায়, কহ তা আমারে,  
অভাগী দাসীর কথা পড়ে তব মনে ?  
তবে যদি নিজগুণে, গুণনিধি তুমি,  
ভুলিয়া না থাক তারে,—আশীর্বাদ কর,  
নমে পদে, ধনঞ্জয়, দ্রুপদ-নন্দিনী—  
কৃতাঞ্জলি-পুটে দাসী নমে তব পদে !

হায়, নাথ, বৃথা জন্ম নারীকূলে মম !  
কেন যে লিখিলা বিধি এ পোড়া কপালে  
হেন তাপ ; কেন পাপে দণ্ডিলা দাসীরে  
এরূপে, কে কবে মোরে ? সুধিব কাহারে ?  
রবি-পরায়ণা, মরি, সরোজিনী ধনী,  
তবু নিত্য সমীরণ কহে তার কানে  
প্রেমের রহস্য কথা ! অবিরল লুটে  
পরিমল ! শিলামুখ, গুঞ্জরি সতত,  
(কি লজ্জা ! ) অধর-মধু পান করে সুখে !  
সৃজিলা কমলে যিনি, সৃজিলা দাসীরে  
সেই নিদারুণ বিধি ! কারে নিন্দি, কহ,  
অরিন্দম ? কিন্তু কহি ধর্ম্মে সাক্ষী মানি,  
শুন তুমি, প্রাণকান্ত ! রবির বিরহে,  
নলিনী মলিনী যথা মুদিত বিধাদে ;  
মুদিত এ পোড়া প্রাণ তোমার বিহনে !  
সাধে যদি শত অলি গুঞ্জরিয়া পদে ;  
সহস্র মিনতি যদি করে কর্ণ-মূলে  
সমীরণ, ফোটে কি হে কভু পঙ্কজিনী,  
কনক-উদয়াচলে না হেরি মিহিরে,  
কিরীটি ? আঁধার বিশ্ব এ পোড়া নয়নে,  
হায় রে, আঁধার নাথ, তোমার বিরহে—  
জীবশূন্য, রবশূন্য, মহারণ্য যেন !  
আর কি কহিব, দেব, ও রাজীব-পদে ?  
পাঞ্চালীর চির-বাঙ্গা, পাঞ্চালীর পতি  
ধনঞ্জয় ! এই জানি, এই মানি মনে ।

যা ইচ্ছা করুন ধর্ম্ম, পাপ করি যদি  
ভালবাসি নুমণিরে,—যা ইচ্ছা, নুমণি !  
হেন সুখ ভুঞ্জি, দুঃখ কে ডরে ভুঞ্জিতে ?

যজ্ঞানলে জনমিল দাসী যাজ্ঞসেনী,  
জান তুমি, মহাযশা ! তরুণ যৌবনে  
রূপ গুণ যশে তব, হায় রে, বিবশা,  
বরিনু তোমায় মনে ! সখীদলে লয়ে  
কত যে খেলিনু খেলা, কহিব কেমনে ?  
বৈদেহীর সুকাহিনী শুনি লোকমুখে  
শিবের মন্দিরে পশি পুষ্পাঞ্জলি দিয়া,  
পূজিতাম শিবধনুঃ !<sup>৪</sup> কহিতাম সাধে,—  
‘স্বয়িবেশে স্বপ্ন আশু দেখাও জনকে  
(জানি কামরূপ তুমি ! ) দিতে এ দাসীরে  
সে পুরুষোত্তমে, যিনি দুই খণ্ড করি,  
হে কোদণ্ড, ভাস্কিবেন তোমায় স্ববলে !  
তা হলে পাইব নাথে, বলী-শ্রেষ্ঠ তিনি !’  
শুনি বৈদর্ভীর কথা, ধরিতাম ফাঁদে  
রাজহংসে ;<sup>৫</sup> দিয়া তারে আহার, পরায়ে  
সুবর্ণ-মুৎঘুর পায়ে, কহিতাম কানে,—  
‘যমুনীর তীরে পুরী বিখ্যাত জগতে  
হস্তিনা ;—তথায় তুমি, রাজহংসপতি,  
যাও শীঘ্র শূন্যপথে, হেরিবে সে পুরে  
নরোত্তমে ; তাঁর পদে কহিও, দ্রৌপদী  
তোমার বিরহে মরে দ্রুপদ-নগরে !’  
এই কথা কয়ে তারে দিতাম ছাড়িয়া ।  
হেরিলে গগনে মেঘে, কহিতাম নমি ;—  
‘বাহন যাঁহার তুমি, মেঘ-কুল-পতি,  
পুত্রবধু তাঁর আমি ;<sup>৬</sup> বহ তুলি মোরে,  
বহ যথা বারি-ধারা, নাথের চরণে !  
জল-দানে চাতকীরে তোম দাতা তুমি,  
তোমার বিরহে, হায়, তৃষাতুরা যথা  
সে চাতকী, তৃষাতুরা আমি, ঘনমণি !  
মোর সে বারিদ-পদে দেহ মোরে লয়ে !’

আর কি শুনিবে, নাথ ? উঠিল যৎকালে  
জনরব—‘জতুগৃহে দহি মাতৃ-সহ  
তাজিলা অকালে দেহ পঞ্চ পাণ্ডুরথী,’—  
কত যে কাঁদিনু আমি, কব তা কাহারে ?  
কাঁদিনু—বিধবা যেন হইনু যৌবনে !  
প্রাথিনু রতির পূজি,—‘হর-কোপানলে,

৪. রামায়ণের সীতার স্বয়ম্বর প্রসঙ্গ । ৫. নল-দয়মন্তীর পৌরাণিক প্রসঙ্গ । ৬. ইন্দ্র । মেঘবাহন ইন্দ্রের ঔরসে কুন্তীর গর্ভে অর্জুনের জন্ম । ৭. মহাভারতের জতুগৃহদাহ প্রসঙ্গ ।

হে সতি, পুড়িলা যবে প্রাণ-পতি তব  
কত যে সহিলা দুঃখ, তাই স্মরি মনে,  
বাঁচাও মদনে মোর,—এই ভিক্ষা মাগি।’

পরে স্বয়ম্বরোৎসব। আঁধার দেখিনু  
চৌদিক, পশিনু যবে রাজসভা-মাঝে!  
সাধিনু মাটিরে ফাটি হইতে দুখানি!  
দাঁড়াইয়া লক্ষ্য-তলে কহিনু, ‘খসিয়া  
পড় তুমি পোড়া শিরে বজ্রাশ্মি-সদৃশ,  
হে লক্ষ্য! জ্বলিয়া আমি মরি তব তাপে,  
প্রাণ-পতি জতুগৃহে জ্বলিলা যেমতি  
না চাহি বাঁচিতে আর! বাঁচিব কি সাথে?’

উঠিল সভায় রব,—‘নারিলা ভেদিতে  
এ অলক্ষ্য লক্ষ্যে আজি ক্ষত্ররথী যত।’—  
জান তুমি, গুণমণি, কি ঘটিল পরে।  
ভাস্মরাশি মাঝে গুপ্ত বৈশ্বানর-রূপে  
কি কাজ করিলা তুমি, কে না জানে ভবে,  
রথীশ্বর? বজ্রনাদে ভেদিল আকাশে  
মৎস্য-চক্ষুঃ তীক্ষ্ণ শর! সহসা ভাসিল  
আনন্দ-সলিলে প্রাণ; শুনি নু সুবাণী  
(স্বপ্নে যেন!) ‘এই তোর পতি, লো পাঞ্চালি!  
ফুল-মালা দিয়ে গলে, বর নরবরে!’  
চাহিনু বরিতে, নাথ, নিবারিলা তুমি  
অভাগীর ভাগ্য দোষে। তা হলে কি তবে  
এ বিষম তাপে, হায়, মরিত এ দাসী?

কিন্তু বৃথা এ বিলাপ!—হৃৎকারি রোষে,  
লক্ষ রাজরথী যবে বেড়িল তোমারে;  
অশ্বরাশি-নাদ সম কশ্মুরাশি যবে  
নাদিল সে স্বয়ম্বরে;—কি কথা কহিয়া  
সাহসিলা এ দাসীরে, পড়ে কি হে মনে?  
যদি ভুলে থাক তুমি, ভুলিতে কি পারে  
দ্রৌপদী? আসন্ন কালে সে সুকথাগুলি  
জপিয়া মরিব, দেব, মহামন্ত্র-জ্ঞানে!  
কহিলে সস্বোধি মোরে সুমধুর স্বরে;—  
‘আশারূপে মোর পাশে দাঁড়াও, রূপসি!  
দ্বিগুণ বাড়িবে বল চন্দ্রমুখ হেরি  
চন্দ্রমুখি! যত ক্ষণ ফণীশ্বের দেহে  
থাকে প্রাণ, কার সাধ্য হরে, শিরোমণি?  
আমি পার্থ!—ক্ষম, নাথ, লাগিল তিতিতে  
অনর্গল অশ্রুজল এ লিপি! কেন না,—  
হায় রে, কেন না আমি মরিনু চরণে

সে দিন।—কি লিখি, হায়, না পাই দেখিতে!  
আঁধা, বঁধু, অশ্রুশ্রীতে এ তব কিঙ্করী!—\* \*

\* \* এত দূর লিখি কালি, ফেলাইনু দূরে  
লেখনী। আকুল প্রাণ উঠিল কাঁদিয়া  
স্মরি পূর্ব-কথা যত। বসি তরু-মূলে,  
হায় রে, তিতিনু, নাথ, নয়ন-আসারে!'  
কে মুছিল চক্ষুঃ-জল? কে মুছিবে কহ?  
কে আছে এ অভাগীর এ ভব-মণ্ডলে?  
ইচ্ছা করে ত্যজি প্রাণ ডুবি জলাশয়ে;  
কিন্মা পান করি বিষ; কিন্তু ভাবি যবে,  
প্রাণেশ, ত্যজিলে দেহ আর না পাইব  
হেরিতে ও পদযুগ,—সাম্বুনি পরাণে  
ভুলি অপমান, লজ্জা, চাহি বাঁচিবারে!  
অগ্নিতাপে তপ্তা সোনা গলে হে সোহাগে,  
পায় যদি সোহাগায়! কিন্তু কহ, রথি,  
কবে ফিরি আসি দেখা দেবে এ কাননে?  
কহ ত্রিদিবের বার্তা। কবীশ্বর তুমি,  
গাঁথি মধুমাখা গাথা পাঠাও দাসীরে।  
ইচ্ছা বড়, গুণমণি, পরিতে অলকে  
পারিজাত; যদি তুমি আন সঙ্গে করি,  
দ্বিগুণ আদরে ফুল পরিব কুন্তলে!  
শুনেছি কামদা<sup>১০</sup>—না কি দেবেশ্বের পুরী;—  
এ দাসীর প্রতি যদি থাকে দয়া হৃদে,  
ভুলিতে পার হে যদি সুর-বালা-দলে,  
এ কামনা কামধুকে<sup>১১</sup> কর দয়া করি,  
পাও যেন অভাগীরে চরণ-কমলে  
ক্ষণ কাল! জুড়াইব নয়ন সুমতি  
ও রূপ-মাধুরী হেরি,—ভুলি এ বিচ্ছেদে;  
অঙ্গরা-বল্লভ তুমি; নর-নারী দাসী;  
তা বল্যে করো না ঘৃণা—এ মিনতি পদে!  
স্বর্ণ-অলঙ্কার যারা পরে শিরোদেশে,  
কণ্ঠে, হস্তে; পরে না কি রজত চরণে?  
কি ভাবে কাটাই কাল এ বিকট বনে  
আমরা, কহিব এবে, শুন, গুণনিধি।  
ধর্ম-কর্ম-রত সদা ধর্মরাজ-ঋষি;  
ধৌমা পুরোহিত নিত্য তুঘেন রাজনে  
শাস্ত্রালাপে। মৃগয়ায় রত ভ্রাতা তব  
মধ্যম; অনুজ-দ্বয়, মহা-ভক্তিভাবে,  
সেবেন অগ্রজ-দ্বয়ে; যথাসাধ্য, দাসী  
নির্বাহে হে মহাবাহু, গৃহ-কার্য্য যত।

৮. দ্রৌপদীর স্বয়ম্বরে অর্জুনের লক্ষ্যভেদ প্রসঙ্গ। ৯. অশ্রু। ১০. কামনা বা অতীষ্ট দান করেন যে দেবী।

১১. কামনাদাত্রী অর্থাৎ অতীষ্টদাত্রী।

কিন্তু ক্ষুধমনা সবে তোমার বিহনে !  
স্মরি তোমা অশ্রুণীয়ে তিতেন নৃপতি,  
আর তিন ভাই তব। স্মরিয়া তোমারে,  
আকুল এ পোড়া প্রাণ, হায়, দিবা নিশি !  
পাই যদি অবসর, কুটীর তেয়াগি  
স্মৃতি-দূতী সহ, নাথ, ভ্রমি একাকিনী,  
পূর্বের কাহিনী যত শুনি তাঁর মুখে !  
পাণ্ডব-কুল-ভরসা, মহেব্বাস, ১২ তুমি !  
বিমুখিবে তুমি, সখে, সম্মুখ-সমরে  
ভীষ্ম দ্রোণ কর্ণ শুরে ; নাশিবে কৌরবে !  
বসাইবে রাজাসনে পাণ্ডু-কুল-রাজে ;—  
এই গীত গায় আশা নিত্য এ আশ্রমে !  
এ সঙ্গীত-ধ্বনি, দেব, শুনি জাগরণে।  
শুনি স্বপ্নে নিশাভাগে এ সঙ্গীত-ধ্বনি !  
কে শিখায় অস্ত্র তোমা, কহ, সুরপুরে,  
অস্ত্রী-কুল-গুরু তুমি ? এই সুর-দলে  
প্রচণ্ড গাণ্ডীব তুমি টঙ্কারি হংকারে,  
দমিলা খাণ্ডব-রণে ! ১৩ জিনিলা একাকী  
লক্ষ্যরাজে, রথীরাজ, লক্ষ্য-ভেদ-কালে ! ১৪  
নিপাতিলা ভূমিতলে বলে ছন্দবশী  
কিরাতেরে ! ১৫ এ ছলনা, কহ, কি কারণে ?

এস ফিরি, নররত্ন ! কে ফেরে বিদেশে  
যুবতী পত্নীরে ঘরে রাখি একাকিনী ?  
কিন্তু যদি সুরনারী প্রেম-ফাঁদ পাতি  
বেঁধে থাকে মনঃ, বঁধু, স্মর ভ্রাতৃ-ত্রয়ে—  
তোমার বিরহ-দুঃখে দুঃখী অহরহ !  
আর কি অধিক কব ? যদি দয়া থাকে,  
আসি দেখ কি দশায় তোমার বিরহে,  
কি দশায়, প্রাণেশ্বর, নিবাসি এ দেশে !  
পাইয়াছি দৈবে, দেব, এ বিজন বনে  
ঋষিপত্নী পুণ্যবতী ; পূর্বপুণ্য-বলে  
স্বেচ্ছাচার ১৬ পুত্র তাঁর ! তেজস্বী সুশিশু  
দিবামুখে রবি যেন। বেদ-অধ্যয়নে  
সদা রত ! দয়া করি বহিবেন তিনি,  
মাতৃ-অনুরোধে পত্র, দেবেস্ত্র-সদনে।  
যথাবিধি পূজা তাঁর করিও, সুমতি !  
লিখিলে উত্তর তিনি আনিবেন হেথা।  
কি কহিনু, নরোত্তম ? কি কাজ উত্তরে ?  
পত্রবহ সহ ফিরি আইস এ বনে !

ইতি শ্রীবীরাঙ্গনাকাব্যে দ্রৌপদী-পত্রিকা নাম  
ষষ্ঠ সর্গ।

## সপ্তম সর্গ

### দুর্যোধনের প্রতি ভানুমতী

[ভগদত্তপত্নী ভানুমতী দেবী রাজা দুর্যোধনের পত্নী। কুরুক্ষেত্র দুর্যোধন পাণ্ডবকুলের সহিত কুরুক্ষেত্রযুদ্ধে যাত্রা করিলে অল্প দিনের মধ্যে রাজমহিষী ভানুমতী তাঁহার নিকট নিম্নলিখিত পত্রিকাখানি প্রেরণ করিয়াছিলেন।]

অধীর সতত দাসী, যে অবধি তুমি  
করি যাত্রা পশিয়াছ কুরুক্ষেত্র-রণে !  
নাহি নিদ্রা ; নাহি রুচি, হে নাথ, আহারে !  
না পারি দেখিতে চখে খাদ্যদ্রব্য যত।  
কভু যাই দেবালয়ে ; কবু রাজোদ্যানে ;  
কভু গৃহ-চূড়ে উঠি, দেখি নিরখিয়া  
রণ-স্থল। রেণু-রাশি গগন আবরে  
ঘন ঘনজালে যেন ; জ্বলে শর-রাশি,

বিজলীর ঝালা সম ঝালসি নয়নে !  
শুনি দূর সিংহনাদ, দূর শঙ্খ-ধ্বনি,  
কাঁপে হিয়া থরথরে ! যাই পুনঃ ফিরি।  
স্তম্ভের আড়ালে, দেব, দাঁড়ায়ে নীরবে,  
শুনি সঞ্জয়ের মুখে যুদ্ধের বারতা,  
যথা বসি সভাতলে অন্ধ নরপতি ! ১  
কি যে শুনি, নাহি বুঝি—আমি পাগলিনী !  
মনের জ্বালায় কভু জলাঞ্জলি দিয়া

১২. মহাধনুর্ধর। ১৩. ঋণ্ডবদাহনের মহাভারতীয় প্রসঙ্গ। ১৪. মহাভারতের দ্রৌপদীর স্বয়ম্বর প্রসঙ্গ। ১৫. কিরাতবশী মহাদেবের সঙ্গে অর্জুনের যুদ্ধ প্রসঙ্গ। তবে অর্জুন তাঁকে নিপাতিত করিতে পারেননি। সাহস ও রণকৌশলে সন্তুষ্ট করে বর লাভ করেছিলেন। মহাভারতীয় প্রসঙ্গ। ১৬. যে ইচ্ছামাত্র সর্বত্র ভ্রমণ করতে পারে।

১. ধৃতরাষ্ট্র।

মধু—১১

লজ্জায়, পড়িয়া কাঁদি, শাশুড়ীর<sup>২</sup> পদে,  
নয়ন-আসারে ধৌত করি পা দুখানি।  
নাহি সরে কথা মুখে, কাঁদি মাত্র খেদে!  
নারি সাস্তুনিতে মোরে, কাঁদেন মহিষী;  
কাঁদে কুরু-বধু যত! কাঁদে উচ্চ-রবে,  
মায়ের আঁচল ধরি, কুরু-কুল-শিশু,  
তিতি অশ্রুণীরে, হায়, না জানি কি হেতু!  
দিবা নিশি এই দশা রাজ-অবরোধে<sup>৩</sup>।

কৃষ্ণণে মাতুল<sup>৪</sup> তব—ক্ষম দুঃখিনীরে!—  
কৃষ্ণণে মাতুল তব, ক্ষত্র-কুল-প্লানি,  
আইল হস্তিনাপুরে। কৃষ্ণণে শিখিলা  
পাপ অক্ষবিদ্যা<sup>৫</sup>, নাথ, সে পাপীর কাছে!  
এ বিপুল কুল, মরি, মজালে দুশ্মতি,  
কাল-কলিরূপে পশি এ বিপুল-কূলে!

ধর্মশীল কর্মক্ষেত্রে ধর্মরাজ-সম  
কে আছে, কহ তা, শুনি? দেখ ভীমসেনে,  
ভীম পরাক্রমী শুর, দুর্বীর সমরে!  
দেব-নর-পূজ্য পার্থ—অব্যর্থ প্রহরী!  
কত গুণে গুণী, নাথ, নকুল সুমতি,  
সহ শিষ্ট সহদেব, জান না কি তুমি?  
মেদিনী-সদনে রমা<sup>৬</sup> দ্রুপদ-নন্দিনী!  
কার হেতু এ সবারে ত্যজিলা, ভূপতি?  
গঙ্গাজল-পূর্ণ ঘটে, হায় ঠেঁলি ফেলি,  
কেন অবগাহ দেহ কর্মনাশা-জলে?  
অবহেলি দ্বিজোত্তমে চণ্ডালে ভকতি?  
অশ্ব-বিশ্ব, নীরবন্দ ফুলদূর্বাদলে  
নহে মুক্তাফল, দেব। কি আর কহিব?  
কি ছলে ভুলিলা তুমি, কে কবে আমারে?

এখনও দেহ ক্ষমা, এই ভিক্ষা মাগি,  
ক্ষত্রমগি! ভাবি দেখ,—চিত্রসেন যবে,  
কুরুবধুদলে বাঁধি তব সহ রথে,  
চলিল গঙ্ঘর্কদেবে, কে রাখিল আসি  
কুলমান প্রাণ তব, কুরুকুলমগি?<sup>৭</sup>  
বিপদে হেরিলে অরি, আনন্দ-সলিলে

ভাসে লোক; তুমি যার পরমারি,<sup>৮</sup> রাজা,  
ভাসিল সে অশ্রুণীরে তোমার বিপদে!  
হে কৌরবকুলনাথ, তীক্ষ্ণ শরজালে  
চাহ কি বধিতে প্রাণ তাহার সংগ্রামে,  
প্রাণ, প্রাণাধিক মান রক্ষিল যে তব  
অসহায় যবে তুমি,—হায়, সিংহ-সম,  
আনায়-মাঝারে বন্ধ রিপূর কৌশলে?  
—হে দয়া, কি হেতু, মাতঃ, এ পাপ সংসারে  
মানব-হৃদয়ে তুমি কর গো বসতি!

কেন গর্বী কর্ণে তুমি কর্ণদান কর,  
রাজেন্দ্র? দেবতাকূলে জিনিল যে রণে;  
তোমা সহ কুরুসৈন্যে দলিল একাকী  
মৎস্যদেশে<sup>৯</sup>; আঁটিবে কি রাধেয়<sup>১০</sup> তাহারে?  
হায়, বৃথা আশা নাথ। শৃগাল কি কভু  
পারে বিমুখিতে, কহ, মুগেন্দ্র সিংহেরে?  
সূতপুত্র সখা তব? কি লজ্জা, নৃমগি,  
তুমি চন্দ্রবংশচূড়, ক্ষত্রবংশপতি?

জানি আমি বীমবাহু ভীষ্ম পিতামহ;  
দেব-নর-ত্রাস বীর্যে দ্রোণাচার্য গুরু।  
স্নেহপ্রবাহিণী কিঙ্ক এ দোঁহার বহে  
পাণ্ডবসাগরে, কান্ত, কহিনু তোমারে!  
যদিও না হয় তাহা; তবুও কেমনে,  
হায় রে প্রবোধি, নাথ, এ পোড়া হৃদয়ে?<sup>১১</sup>  
উত্তর-গোগৃহ-রণে জিনিল কিরীটী  
একাকী এ বীরঘয়ে। সৃজিলা কি, তুমি,  
দাবান্ধির রূপে, বিধি, জিষু ফাঙ্কনিরে<sup>১২</sup>  
এ দাসীর আশা-বন নাশিতে অকালে?

শুন নাথ; নিদ্রা-আশে মুদি যদি কভু  
এ পোড়া নয়ন দুটি; দেখি মহাভয়ে  
শ্বেত-অশ্ব কপিধ্বজ স্যন্দন সম্মুখে!  
রথমধ্যে কালরূপী<sup>১৩</sup> পার্থ! বাম করে  
গাণ্ডীব<sup>১৪</sup>—কোদণ্ডোত্তম<sup>১৫</sup>। ইরম্মদ-তেজা  
মর্শ্ভভেদী দেব-অস্ত্র শোভে হে দক্ষিণে!  
কাঁপে হিয়া ভাবি শুনি দেবদত্ত-ধ্বনি<sup>১৬</sup>!

২. শাশুড়ী গাঙ্গারী। ৩. রাজ-অস্ত্রপুরে। ৪. শকুনি। ৫. পাশাখেলা। ৬. পৃথিবীতে লক্ষ্মী-স্বরূপিনী। এখানে দ্রৌপদী।  
৭. বনবাসী পাণ্ডবেরা গঙ্ঘর্কদেবের বন্দিদশা থেকে কৌরবদের উদ্ধার করেছিলেন। ৮. পরম শত্রু। ৯. বিরাটনগর। উত্তর  
গোগৃহে কৌরবদের গোহরণকালে অর্জুনের বীরত্বের প্রসঙ্গ। ১০. রাখার পুত্র কর্ণ। ১১. অর্জুন। ১২. সৃষ্টিলায়কালে  
মহাদেবের সংহারমূর্তিকে মহাকাল বলা হয়। এখানে অর্জুন সংহারমূর্তি। ১৩. অর্জুনের ধনুক। ১৪. শ্রেষ্ঠ ধনুক।  
১৫. অর্জুনের যুদ্ধশব্দ।



গরজে বায়ুজ ধ্বজে কাল মেঘ যেন !  
 ঘর্ষরে গস্তীর রবে চক্র, উগরিয়া  
 কালাগ্নি । কি কব, দেব, কিরীটের আভা ?  
 আহা, চন্দ্রকলা যেন চন্দ্রচূড়-ভালে !  
 উজলিয়া দশ দিশ, কুরুসৈন্য-পানে  
 ধায় রথবর বেগে ! পালায় চৌদিকে  
 কুরুসৈন্য,—তমঃ-পুঞ্জ রবির দর্শনে  
 যথা ! কিম্বা বিহঙ্গম হেরিলে অদূরে  
 বজ্রনখ বাজে যথা পালায় কুজনি  
 ভীতচিত ; মিলি আঁখি অমনি কাঁদিয়া !

কি কব ভীমের কথা ? মদকল-করী-  
 সদৃশ উন্মদ দুষ্ট নিধন-সাধনে !  
 জবায়ুগ-সম আঁখি—রক্তবর্ণ সদা ।  
 মার, মার শব্দ মুখে ! ভীম গদা হাতে,  
 দগুধর-হাতে, হায়, কালদগু যথা !  
 শুনেছি লোকের মুখে, দেব-সমাগমে  
 ধরিলা দূরন্তে গর্ভে কুন্তী ঠাকুরাণী ।  
 কিন্তু যদি দেব পিতা, যমরাজ তবে—  
 সর্ব-অসুকারী যিনি ! ব্যাস্ত্রী বুঝি দিল  
 দুষ্ক দুষ্টে ! নর-নারী-সুন-দুষ্ক কভু  
 পালে কি, কহ, হে নাথ, হেন নর-যমে ?

বাড়িতে লাগিল লিপি ; তবুও কহিব  
 কি কু স্বপ্ন, প্রাণনাথ, গত নিশাকালে  
 দেখিনু ;—বুঝিয়া দেখ, বিজ্ঞতম তুমি ;  
 আকুল সতত প্রাণ না পারি বুঝিতে  
 এ কুহক ! গত রাত্রে বসি একাকিনী  
 শয়নমন্দিরে তব—নিরানন্দ এবে—  
 কাঁদিনু ! সহসা, নাথ, পুরিল সৌরভে  
 দশ দিশ ; পূর্ণচন্দ্র-আভা জিনি আভা  
 উজ্জ্বলিল চারি দিক্ ; দাসীর সম্মুখে  
 দাঁড়াইলা দেববালা—অতুলা জগতে !  
 চমকি চরণযুগে নমিনু সভয়ে ।

মুছিয়া নয়নজল, কহিলা কাতরে  
 বিধুমুখী,—‘বৃথা খেদ, কুরুকুলবধু,  
 কেন তুমি কর আর ? কে পারে খণ্ডাতে  
 বিধির বাঁধন, হায়, এ ভবমণ্ডলে ?  
 ওই দেখ যুদ্ধক্ষেত্র !’—দেখিনু তরাসে,  
 যত দূর চলে দৃষ্টি, ভীম রণভূমি !  
 বহিছে শোণিত-শ্রোত প্রবাহিণীরূপে ;  
 পড়িয়াছে গজরাজি, শৈলশৃঙ্গ যেন  
 চূর্ণ বজ্রে ; হতগতি অশ্ব ; রথাবলী  
 ভগ্ন ; শত শত শব ! কেমনে বর্গিব  
 কত যে দেখিনু, নাথ, সে কাল মশানে !  
 দেখিনু রথীন্দ্র এক শরশয্যোপরি !  
 আর এক মহারথী পতিত ভূতলে,  
 কঠে শূন্যগুণ ধনু ;—দাঁড়য়ে নিকটে,  
 আশ্ফালিছে অসি অরি-মস্তক ছেদিতে !  
 আর এক বীরবরে দেখিনু শয়নে  
 ভূশয্যায়া ! রোবে মহী গ্রাসীয়াছে ধরি  
 রথচক্র ; নাহি বক্ষে কবচ ; আকাশে  
 আভাহীন ভানুদেব,—মহাশোকে যেন !  
 অদূরে দেখিনু হৃদ ; সে হৃদের তীরে  
 রাজরথী একজন যান গড়াগড়ি  
 ভগ্ন-উরু ! কাঁদি উচ্ছে, উঠিনু জাগিয়া !  
 কেন এ কুস্বপ্ন, দেব, দেখাইলা মোরে ?

এস তুমি, প্রাণনাথ, রণ পরিহরি !  
 পঞ্চখানি গ্রাম মাত্র মাগে পঞ্চরথী ।  
 কি অভাব তব কহ ? তোষ পঞ্চ জনে ;  
 তোষ অন্ধ বাপ মায়ে ; তোষ অভাগীরে ;—  
 রক্ষ কুরুকুল, ওহে কুরুকুলমণি !

ইতি শ্রীবীরাঙ্গনাকাব্যে ভানুমতী-পত্রিকা নাম  
 সপ্তম সর্গ।

## অষ্টম সর্গ

### জয়দ্রথের প্রতি দুঃশলা

[ অন্ধরাজ ধৃতরাষ্ট্রের কন্যা দুঃশলা দেবী সিদ্ধদেশাধিপতি জয়দ্রথের মহিষী। অভিমন্যুর নিধনান্তর পার্শ্ব যে প্রতিজ্ঞা করিয়াছিলেন, তদ্বশে দুঃশলা দেবী নিতান্ত ভীতা হইয়া নিম্নলিখিত পত্রিকাখানি জয়দ্রথের নিকট প্রেরণ করেন। ]

কি যে লিখিয়াছে বিধি এ পোড়া কপালে,  
হায়, কে কহিবে মোরে,—জ্ঞানশূন্য আমি!  
শুন, নাথ, মনঃ দিয়া ;— মধ্যাহ্নে বসিনু  
অন্ধ পিতৃপদতলে, সঞ্জয়ের মুখে  
শুনিতে রণের বার্তা। কহিলা সুমতি—  
(না জানি পূর্বের কথা ; হিন্দু অবরোধে  
প্রবোধিতে জননীারে ;) কহিলা সুমতি  
সঞ্জয়,—‘বেড়িল পুনঃ সপ্ত মহারথী’  
সুভদ্রানন্দনে, দেব ! কি আশ্চর্য্য, দেখ—  
অগ্নিময় দশ দিশ পুনঃ শরানলে !  
প্রাণপণে যোবে যোধ<sup>১</sup> ; হেলায় নিবारे  
অস্ত্রজালে শূরসিংহ ! ধন্য শূরকুলে  
অভিমন্যু !’ নীরবিলা এতেক কহিয়া  
সঞ্জয় নীরবে সবে রাজসভাতলে  
সঞ্জয়ের মুখ পানে রহিলা চাহিয়া।

‘দেখ, কুরুকুলনাথ,’—পুনঃ আরস্তিলা  
দূরদর্শী,—‘ভঙ্গ দিয়া রণরঙ্গে পুনঃ  
পালাইছে সপ্ত রথী ! নাদিছে ভৈরবে  
আর্জুনি, পাবক যেন গহন বিপিনে !  
পড়িছে অগণ্য রথী, পদাতিক-ব্রজ ;  
গরজি মরিছে গজ বিষম পীড়নে ;  
সভয়ে হ্রৈষিছে অশ্ব ! হায়, দেখ চেয়ে,  
কাঁদিছেন পুত্র তব দ্রোণগুরুপদে !—  
মজিল কৌরব আজি আর্জুনির রণে !’

কাঁদিলা আক্ষেপে পিতা ; কাঁদিয়া মুছিনু  
অশ্রুধারা। দূরদর্শী আবার কহিলা ;—  
‘ধাইছে সমরে পুনঃ সপ্ত মহারথী,  
কুরুরাজ ! লাগে তালি কর্ণমূলে শুনি  
কোদণ্ড-টংকার, প্রভু ! বাজিল নির্ঘোষে

ঘোর রণ ! কোন রথী গুণ সহ কাটে  
ধনু ; কেহ রথচূড়, রথচক্র কেহ।  
কাটিয়া পাড়িলা দ্রোণ ভীম-অস্ত্রাঘাতে  
কবচ ; মরিল অশ্ব ; মরিল সারথি !  
রিক্তহস্ত এবে বীর, তবুও যুঝিছে  
মদকল হস্তী যেন মত্ত রণমদে !’

নীরবিয়া ক্ষণকাল, কহিলা কাতরে  
পুনঃ দূরদর্শী ;—‘আহা ! চিররাহু-গ্রাসে  
এ গৌরব-কুল-ইন্দু পড়িলা অকালে !  
অন্যায় সমরে, নাথ, গতজীব, দেখ,  
আর্জুনি ! হকারে, শুন, সপ্ত জয়ী রথী,  
নাদিছে কৌরবকুল জয় জয় রবে !  
নিরানন্দে ধর্ম্মরাজ চলিলা শিবিরে !’

হরষে বিষাদে পিতা, শুনি এ বারতা,  
কাঁদিলা ; কাঁদিনু আমি। সহসা ত্যজিয়া  
আসন সঞ্জয় বুধ, কৃতাজলি পুটে,  
কহিলা সভয়ে,—‘উঠ, কুরুকুলপতি !  
পূজ কুলদেবে শীঘ্র জামাতার হেতু !  
ওই দেখ কপিধ্বজে ধাইছে ফাঙ্কনি  
অধীর বিষম শোকে ! গরজে গন্তীরে  
হনু স্বর্ণরথচূড়ে। পড়িছে ভূতলে  
খেচর ; ভূচরকুল পালাইছে দূরে !  
ঝকঝকে দিব্য বর্ম্ম ; খেলিছে কিরীটে  
চপলা ; কাঁপিছে ধরা থর থর থরে !  
পাণ্ডু-গণ্ড ত্রাসে<sup>২</sup> কুরু ; পাণ্ডু-গণ্ড ত্রাসে  
আপনি পাণ্ডব নাথ, গাণ্ডীবীর কোপে !  
মুহুমুহুঃ ভীমবাহু টংকারিছে বামে  
কোদণ্ড—ব্রহ্মাণ্ডত্রাস ! শুন কর্ণ দিয়া,  
কহিছে বীরেশ রোমে ভৈরব নিনাদে ;—

১. ব্যাসদেবের বরে সঞ্জয় হস্তিনায় বসে কুরুক্ষেত্রের যুদ্ধ প্রত্যক্ষ করে ধৃতরাষ্ট্রকে বর্ণনা করেছিলেন। এখানে সেই প্রসঙ্গ বলা হয়েছে। ২. দ্রোণ, কর্ণ, কৃপাচার্য, অশ্বখামা, শকুনি, দুর্যোগ্য, দুঃশাসন—এই সপ্ত মহারথী একযোগে যুদ্ধ করে অভিমন্যুকে বধ করেছিল। ৩. যোদ্ধা। ৪. ভয়ে গণ্ডস্থল পাণ্ডুবর্ষ ধারণ করল।

'কোথা জয়দ্রথ এবে,—রোধিল যে বলে  
ব্যুহমুখ? শুন, কহি, ক্ষত্ররথী যত ;  
তুমি, হে বসুধা, শুন ; তুমি জলনিধি ;  
তুমি, স্বর্ণ, শুন ; তুমি, পাতাল, পাতালে ;  
চন্দ্র, সূর্য্য, গ্রহ, তারা, জীব এ জগতে  
আছ যত, শুন সবে ! না বিনাশি যদি  
কালি জয়দ্রথে রণে, মরিব আপনি !  
অগ্নিকুণ্ডে পশি তবে যাব ভূতদেশে,  
না ধরিব অস্ত্র আর এ ভব-সংসারে !'—

অজ্ঞান হইয়া আমি পিতৃপদতলে  
পড়ি। যতনে মোরে আনিয়াছে হেথা—  
এই অন্তঃপুরে—চেড়ী\* পিতার আদেশে।

কহ এ দাসীরে, নাথ ; কহ সত্য করি ;  
কি দোষে আবার দোষী জিষুর সকাশে  
তুমি ? পূর্ব্বকথা স্মরি চাহে কি দণ্ডিতে  
তোমায় গাণ্ডীবী পুনঃ ?\* কোথায় রোধিলে  
কোন ব্যুহমুখ তুমি, কহ তা আমারে ?  
কহ শীঘ্র, নহে, দেব, মরিব তরাসে !  
কাপিছে এ পোড়া হিয়া থরথর করি !  
আঁধার নয়ন, হায়, নয়নের জলে !  
নাহি সরে কথা, নাথ, রসশূন্য মুখে !

কাল অজাগর-গ্রাসে পড়িলে কি বাঁচে  
প্রাণী ? ক্ষুধাতুর সিংহ ঘোর সিংহনাদে  
ধরে যবে বনচরে, কে তারে তাহারে ?  
কে কহ, রক্ষিবে তোমা, ফাঙ্কনি রুধিলে ?

হে বিধাতঃ কি কুক্ষণে, কোন পাপদোষে  
আনিলে নাথেরে হেথা, এ কাল সমরে  
তুমি ? শুনিয়াছি আমি, যে দিন জগ্মিলা  
জ্যেষ্ঠ ভ্রাতা, অমঙ্গল ঘটিল সে দিনে !  
নাদিল কাঁতরে শিবা\* ; কুকুর কাঁদিল  
কোলাহলে ; শূন্যমার্গে গজ্জিল ভীষণে  
শকুনি গৃধিনীপাল ! কহিলা জনকে  
বিদূর—সুমতি তাত ! 'তাজ এ নন্দনে,  
কুরুরাজ ! কুরুবংশ-ধ্বংসরূপে আজি  
অবতীর্ণ তব গৃহে !' না শুনিলা পিতা

সে কথা ! ভুলিলা, হায়, মোহের ছলনে !  
ফলিল সে ফল এবে, নিশ্চয় ফলিল !  
শরশয্যাগত ভীষ্ম, বৃদ্ধ পিতামহ—  
পৌরব-পঙ্কজ-রবি চির রাহুগ্রাসে !  
বীর্য্যাকুর\* অভিমন্যু হতজীব রণে !

কে ফিরে আসিবে বাঁচি এ কাল সমরে ?  
এস তুমি, এস নাথ, রণ পরিহরি !  
ফেলি দূরে বস্ম, চন্দ্র\*, অসি, তুণ, ধন,  
তাজি রথ, পদব্রজে এস মোর পাশে !  
এস, নিশাযোগে দৌঁহে যাইব গোপনে  
যথায় সুন্দরী পুরী সিদ্ধনদতীরে  
হেরে নিজ প্রতিমূর্ত্তি বিমল সলিলে,  
হেরে হাসি সুবদনা সুবদন যথা  
দর্পণে\*\* ! কি কাজ রণে তোমার ? কি দোষে  
দোষী তব কাছে, কহ পঞ্চপাণ্ডু রথী ?  
চাহে কি হে অংশ তারা তব রাজ্যধনে ?  
তবে যদি কুরুরাজে ভালবাস তুমি,  
মম হেতু, প্রাণনাথ ; দেখ ভাবি মনে,  
সমশ্রেমপাত্র তব কুন্তীপুত্র বনী !  
ভ্রাতা মোর কুরুরাজ ; ভ্রাতা পাণ্ডুপতি !  
এক জন জন্যে কেন ত্যজ অন্য জনে,  
কুটুম্ব উভয় তব ?—আর কি কহিব ?  
কি ভেদ হে নদদ্বয়ে জন্ম হিমাঙ্গিতে ?

তবে যদি গুণ দোষ ধর, নরমণি ;—  
পাপ অক্ষত্রীড়া-ফাঁদ কে পাতিল, কহ ?  
কে আনিল সভাতলে (কি লজ্জা ! ) ধরিয়া  
রজস্বলা\*\* ভ্রাতৃবধু ? দেখাইল তাঁরে  
উরু ? কাড়ি নিতে তাঁর বসন চাহিল—  
উলঙ্গিতে অঙ্গ, মরি, কুলাঙ্গনা তিনি ?  
ভ্রাতার সুকীর্তি যত, জান না কি তুমি ?  
লিখিতে শরমে, নাথ, না সরে লেখনী !

এস শীঘ্র, প্রাণসংখে, রণভূমি ত্যজি !  
নিন্দে যদি বীরবৃন্দ তোমায়, হাসিও  
স্বমন্দিরে বসি তুমি ! কে না জানে, কহ,  
মহারথী রথীকূলে সিদ্ধু-অধিপতি ?

৫. অভিমন্যু-নিধনের দিন দেখবারে জয়দ্রথ ছিলেন অজ্ঞেয়। সেকারণে সেদিন তিনি চক্রব্যূহের মুখ রোধ করেছিলেন।  
অভিমন্যুর সাহায্যের জন্য তাই পাণ্ডবপক্ষীয় কোন বীরই ব্যূহের মধ্যে প্রবেশ করতে পারেনি। ৬. পরিচারিকা।  
৭. বনবাসী পাণ্ডবদের কুটির থেকে একবার দ্রৌপদীকে অপহরণ করার চেষ্টা করে জয়দ্রথ বিশেষভাবে লালিত  
হয়েছিলেন। ৮. শূগাল। ৯. বীরের অক্ষুর স্বরূপ। অভিমন্যু ছিলেন কিশোরবীর। ১০. ঢাল। ১১. একটি সুন্দর উপমা।  
১২. ঋতুমতী।

যুঝেছ অনেক যুদ্ধে ; অনেক বধেছ  
রিপু ; কিন্তু এ কৌন্তেয়, হায়, ভবধামে  
কে আছে প্রহরী, কহ, ইহার সদৃশ ?  
ক্ষত্রকুল-রথী তুমি, তবু নরযোনি ;  
কি লাজ তোমার, নাথ, ভঙ্গ যদি দেহ  
রণে তুমি হেরি পার্থে, দেবযোনি-জয়ী ?  
কি করিলা আশুগুণ খাণ্ডব দাহনে ?  
কি করিলা চিত্রসেন গন্ধর্বাধিপতি ?  
কি করিলা লক্ষ রাজা স্বয়ম্বর কালে ?  
স্মর, প্রভু ! কি করিলা উত্তর গোগৃহে  
কুরুসেন্য নেতা যত পার্থের প্রতাপে ?  
এ কালান্ধি কুণ্ডে, কহ, কি সাথে পশিবে ?  
কি সাথে ডুবিবে, হায়, এ অতল জলে ?

ভুলে যদি থাক মোরে, ভুল না নন্দনে,  
সিন্ধুপতি ; মণিভদ্রে ভুল না, নুমণি !  
নিশার শিশির যথায় পালয়ে মুকুলে  
রসদানে ; পিতৃস্নেহ, হায় রে, শৈশবে  
শিশুর জীবন, নাথ, কহিনু তোমারে ।

জানি আমি কহিতেছে আশা তব কানে—

মায়াবিনী !—‘দ্রোণ গুরু সেনাপতি এবে ;  
দেখ কর্ণ ধনুর্ধরে ; অশ্বখামা শুরে ;  
কৃপাচার্য্যে ; দুর্য্যোধনে—ভীম গদাপাণি !  
কাহারে ডরাও তুমি, সিদ্ধদেশপতি ?  
কে সে পার্থ ? কি সামর্থ্য তাহার নাশিতে  
তোমায় ?’—শুন না, নাথ, ও মোহিনী বাণী !  
হায়, মরীচিকা আশা ভব-মরুভূমে !  
মুদি আঁধি ভাব,—দাসী পড়ি পদতলে ;  
পদতলে মণিভদ্র কাঁদিছে নীরবে ।

ছন্নবেশে রাজদ্বারে থাকিব দাঁড়িয়ে  
নিশীথে ; থাকিবে সঙ্গে নিপুণিকা সখী,  
লয়ে কোলে মণিভদ্রে । এসো ছন্নবেশে,  
না কয়ে কাহারে কিছু ! অবিলম্বে যাব  
এ পাপ নগর ত্যজি সিদ্ধুরাজ্যলয়ে ।  
কপোতমিথুন সম যাব উড়ি নীড়ে !—  
ঘটুক যা থাকে ভাগ্যে কুরু পাণ্ডু কুলে !

ইতি শ্রীবীরাক্ষনাকাব্যে দুঃশলা-পত্রিকা নাম  
অষ্টম সর্গ ।

## নবম সর্গ

### শান্তনুর প্রতি জাহ্নবী

[জাহ্নবী দেবীর বিরহে রাজা শান্তনু একান্ত কাতর হইয়া রাজ্যাদি পরিত্যাগপূর্ব্বক বহু দিবস গঙ্গাতীরে উদাসীনভাবে  
কালান্তিপাত করেন । অষ্টম বসু অবতার দেবব্রত (যিনি মহাভারতীয় ইতিবৃত্তে ভীষ্ম পিতামহ নামে প্রথিত) বয়ঃপ্রাপ্ত  
হইলে জাহ্নবী দেবী নিম্নলিখিত পত্রিকাখানির সহিত পুত্রবরকে রাজসম্মিধান্নে প্রেরণ করিয়াছিলেন ।]

বৃথা তুমি, নরপতি, ভ্রম মম তীরে,—  
বৃথা, অশ্রুজল তব, অনর্গল বহি,  
মম জলদল সহ মিশে দিবানিশি ।  
ভুল ভূতপূর্ব্ব কথা, ভুলে লোক যথা  
স্বপ্ন—নিদ্রা-অবসানে । এ চিরবিচ্ছেদে  
এই হে ঔষধ মাত্র, কহিনু তোমারে ।

হর-শির-নিবাসিনী হরপ্রিয়া আমি  
জাহ্নবী । তবে যে কেন নরনারীরূপে  
কাটাইনু এত কাল তোমার আলয়ে,  
কহি, শুন । ঋষিশ্রেষ্ঠ বশিষ্ঠ সরোবে  
ভূতলে জন্মিতে শাপ দিলা বসুদলে  
যে দিন, পড়িল তারা কাঁদি মোর পদে,

করিয়া মিনতি স্তুতি নিষ্কৃতির আশে ।  
দিনু বর—‘মানবিনী ভাবে ভবতলে  
ধরিব এ গর্ভে আমি তোমা সবাচারে ।’

বরিনু তোমারে সাথে, নরবর তুমি  
কৌরব ! ওরসে তব ধরিনু উদরে  
অষ্ট শিশু,—অষ্ট বসু তারা, নরমণি !  
ফুটিল এক মৃগালে অষ্ট সরোরুহ ?  
কত যে পুণ্য হে তব, দেখ ভাবি মনে !

সপ্ত জন ত্যজি দেহ গেছে স্বর্গধামে ।  
অষ্টম নন্দনে আজি পাঠাই নিকটে ;  
দেবনররূপী রত্নে গ্রহ যন্তে তুমি  
রাজন ! জাহ্নবীপুত্র দেবব্রত বলী

উজ্জ্বলিবে বংশ তব, চন্দ্রবংশপতি ;—  
শোভিবে ভারত-ভালে শিরোমণিরূপে,  
যথা আদিপিতা তব চন্দ্রচূড়-চূড়ে ।

পালিয়াছি পুত্রবরে আদরে, নৃমণি,  
তব হেতু । নিরখিয়া চন্দ্রমুখ, ভুল  
এ বিচ্ছেদ-দুঃখ তুমি । অখিল জগতে,  
নাহি হেন শুণী আর, কহিনু তোমারে !  
মহাচল-কুল-পতি হিমাচল যথা ;  
নদপতি সিঙ্কনদ ; বন-কুলপতি  
খাণ্ডব ; রথীন্দ্রপতি দেবব্রত রথী—  
বশিষ্ঠের শিষ্যশ্রেষ্ঠ ! আর কব কত ?  
আপনি বাগদেবী, দেব, রসনা-আসনে  
আসীনা ; হৃদয়ে দয়া, কমলে কমলা ;  
যমসম বল ভুজে । গহন বিপিনে  
যথা সর্বভূক বহ্নি, দুর্বার সমরে ।  
তব পুণ্যবৃক্ষ-ফল এই, নরপতি ।  
স্নেহের সরসে পদ্ম । আশার আকাশে  
পূর্ণশশী ! যত দিন ছিনু তব গৃহে  
পাইনু পরম প্রীতি ! কৃতজ্ঞতাপাশে  
বঁধেছ আমারে তুমি ; অভিজ্ঞানরূপে<sup>১</sup>  
দিতেছি এ রত্ন আমি, গ্রহ, শান্তমতি ।

পত্নীভাবে আর তুমি ভেবো না আমারে ।  
অসীম মহিমা তব ; কুল মান ধনে  
নরকুলেশ্বর তুমি এ বিশ্বমণ্ডলে ।  
তরুণ যৌবন তব ;—যাও ফিরি দেশে;—

কাতরা বিরহে তব হস্তিনা নগরী !

যাও ফিরি, নরবর, আন গৃহে বরি  
বরাসী রাজেন্দ্রবালে<sup>২</sup> ; কর রাজ্য সুখে ।  
পাল প্রজা ; দম রিপু ; দশু পাপাচারে—  
এই হে সুরাজনীতি ;—বাড়াও সতত  
সতের আদর সাধি সংক্রিয়া<sup>৩</sup> যতনে ।

বরিও এ পুত্রবরে যুবরাজ-পদে  
কালে । মহাযশা পুত্র হবে তব সম,  
যশস্বি, প্রদীপ যথা ছলে সমতেজে  
সে প্রদীপ সহ, যার তেজে সে তেজস্বী !

কি কাজ অধিক কয়ে ? পূর্বকথা ভুলি,  
করি যৌত ভক্তিরসে কামগত মনঃ,  
প্রণম সপ্তাঙ্গে, রাজা ! শৈলেন্দ্রনন্দিনী  
রুদ্রেন্দ্রগৃহিণী গঙ্গা আশীষে তোমারে ।  
যত দিন ভবধামে রহে এ প্রবাহ,  
ঘোষিবে তোমার যশ, গুণ ভবধামে ।  
কহিবে ভারতজন,—ধন্য ক্ষত্রকুলে  
শাস্তনু, তনয় যার দেবব্রত রথী !

লয়ে সঙ্গে পুত্রধনে যাও রঙ্গে চলি  
হস্তিনায়, হস্তিগতি ! অন্তরীক্ষে থাকি  
তব পুরে, তব সুখে হইব হে সুখী,  
তনয়ের বিধুমুখ হেরি দিবানিশি ।

ইতি শ্রীবীরাক্সনাকাব্যে জাহ্নবীপত্রিকা নাম  
নবমঃ সর্গঃ ।

## দশম সর্গ

### পুরুষবার প্রতি উর্বশী

[চন্দ্রবংশীয় রাজা পুরুষবা কোন সময়ে কেশী নামক দৈত্যের হস্ত হইতে উর্বশীকে উদ্ধার করেন । উর্বশী রাজার রূপলাভ্যে মোহিত হইয়া তাঁহাকে এই নিম্নলিখিত পত্রিকাখানি লিখিয়াছিলেন । পাঠকবর্গ কবি কালিদাসকৃত বিক্রমোর্বশী নাম ট্রোটক পাঠ করিলে, ইহার সবিশেষ বৃত্তান্ত জানিতে পারিবেন ।]

স্বর্গচ্যুত আজি, রাজা, তব হেতু আমি !—  
গত রাত্রে অভিনি<sup>১</sup> দেব-নাট্যশালে  
লক্ষ্মীস্বয়ম্বর নাম নাটক ; বারুণী  
সাজিল মেনকা ; আমি অস্তোজা<sup>২</sup> ইন্দ্রিা ।  
কহিলা বারুণী,—‘দেখ নিরখি চৌদিকে,

বিধুমুখি ! দেবদল এই সভাতলে ;  
বসিয়া কেশব ওই ! কহ মোরে, শুনি,  
কার প্রতি ধায় মনঃ ?’—গুরুশিক্ষা ভুলি,  
আপন মনের কথা দিয়া উত্তরিনু—  
‘রাজা পুরুষবা প্রতি !’—হাসিলা কৌতুকে

২. মহাদেবের শিরোভূষণ চন্দ্র । পুরাণে চন্দ্র চন্দ্রবংশের আদিপুরুষ রূপে বর্ণিত । ৩. নিদর্শন ।

৪. রাজনন্দিনীকে । ৫. সংক্রিয়া বা পুণ্যকর্ম ।

১. অভিনয় করলাম । ২. সমুদ্রময়নে উষিত লক্ষ্মী ।

মহেন্দ্র° ইন্দ্রাণী সহ, আর দেব যত ;  
চারি দিকে হাস্যধ্বনি উঠিল সভাতে ।  
সরোষে ভরতঋষি শাপ দিলা মোরে ।

শুন, নরকুলনাথ ! কহিনু যে কথা  
মুক্তকণ্ঠে কালি আমি দেবসভাতলে,  
কহিব সে কথা আজি—কি কাজ শরমে ?—  
কহিব সে কথা আমি তব পদযুগে ।  
যথা বহে প্রবাহিনী বেগে সিঙ্কলীরে,  
অবিরাম ; যথা চাহে রবিচ্ছবি পানে  
স্থির আঁখি সূর্যমুখী ; ও চরণে রত  
এ মনঃ।—উর্বশী, প্রভু, দাসী হে তোমারি ।  
ঘৃণা যদি কর, দেব, কহ শীঘ্র, শুনি ।  
অমরা অঙ্করা আমি, নারিব তাজিতে  
কলেবর ; যোর বনে পশি আরঙিব  
তপঃ তপস্বিনীবেশে, দিয়া জলাঞ্জলি  
সংসারের সুখে, শুর। যদি কৃপা কর,  
তাও কহ ; যাব উড়ি ও পদ-আশ্রয়ে,  
পিঞ্জর ভাঙিলে উড়ে বিহঙ্গিনী যথা  
নিকুঞ্জে । কি ছার স্বর্গ তোমার বিহনে ?

শুভক্ষণে কেশী, নাথ, হরিল আমারে  
হেমকুটে । এখনও বসিয়া বিরলে  
ভাবি সে সকল কথা ! ছিনু পড়ি রথে,  
হায় রে, কুরঙ্গী যথা ক্ষত অস্ত্রাঘাতে !  
সহসা কাঁপিল গিরি । শুনিনু চমকি  
রথচক্রধ্বনি দুরেঃ শতস্রোতঃ সম ।  
শুনিনু গভীর নাদ—‘অরে রে দুশ্রুতি,  
মুহূর্তে পাঠাব তোরে শমনভবনে,’—  
প্রতিনাদরূপে কেশী নাদিল ভৈরবে ।  
হারাইনু জ্ঞান আমি সে ভীষণ স্বনে ।

পাইনু চেতন যবে, দেখিনু সম্মুখে  
চিত্রলেখা সখী সহ ও রূপমাধুরী—  
দেবী মানবীর বাঞ্ছা । উজ্জ্বল দেখিনু  
দ্বিশুণ, হে গুণমণি, তব সমাগমে  
হেমকূট হৈমকান্তি—রবিকরে যেন ।

রহিনু মুদিয়া আঁখি শরমে, নৃমণি ;  
কিন্তু এ মনের আঁখি মীলিল° হরষে

দিনান্তে কমলাকান্তে° হেরিলে যেমতি  
কমল ! ভাসিল হিয়া আনন্দ-সলিলে ।

চিত্রলেখা পানে তুমি কহিলা চাহিয়া,—  
‘যথা নিশা, হে রূপসি, শশীর মিলনে  
তমোহীনা ; রাত্রিকালে অগ্নিশিখা যথা  
ছিন্নধুমপুঞ্জ-কায়া° ; দেখ নিরখিয়া,  
এ বরাক্ষ° বরকটি° রিচ্যমান° এবে  
মোহান্তে । ভাঙিলে পাড়, মলিনসলিলা  
হয়ে ক্ষণ, এইরূপে বহেন জাহ্নবী  
আবার প্রসাদে, শুভে !’—আর যা কহিলে,  
এখনো পড়িলে মনে বাখানি, নৃমণি,  
রসিকতা । নরকুল ধন্য তব গুণে ।  
এ পোড়া হৃদয় কম্পে কম্পমান দেখি  
মন্দারের দাম বক্ষে, মধুচ্ছন্দে তুমি  
পড়িলা যে শ্লোক, কবি, পড়ে কি হে মনে ?  
স্রিয়মাণ জন যথা শুনে ভক্তিভাবে  
জীবনদায়ক মন্ত্র, শুনিল উর্বশী,  
হে সুধাংশু-বংশ-চূড়, তোমার সে গাথা ।  
সুরবালা-মনঃ তুমি ভুলালে সহজে,  
নররাজ ! কেনই বা না ভুলাবে, কহ ?—  
সুরপুর-চির-অরি অধীর বিক্রমে  
তোমার, বিক্রমাদিত্য । বিধাতার বরে,  
বজ্রীর অধিক বীর্য্য তব রণস্থলে ।  
মলিন মনোজ লাজে ও সৌন্দর্য্য হেরি ।  
তব রূপগুণে তবে কেন না মজ্জিবে  
সুরবালা ? শুন, রাজা ! তব রাজবনে  
স্বয়ম্বরবধু-লতা বরে সাধে যথা  
রসালে, রসালে বরে তেমতি নন্দনে  
স্বয়ম্বরবধু-লতা । রূপগুণাধীনা  
নারীকুল, নরশ্রেষ্ঠ, কি ভবে কি দিবে—  
বিধির বিধান এই, কহিনু তোমারে ।  
কঠোর তপস্যা নর করি যদি লভে  
স্বর্গভোগ ; সর্ব্ব অশ্রে বাঞ্ছা সে ভুক্তিতে  
যে স্থির-যৌবন-সুখা—অর্পিব তা পদে ।  
বিকাহিব কায়মনঃ উভয় নৃমণি,  
আসি তুমি কেন দৌঁহে প্রেমের বাজারে ।

৩. দেবরাজ ইন্দ্র । ৪. উন্নীলিত হল । ৫. হওয়া উচিত ছিল কমলাকান্তে—অর্থাৎ চন্দ্রকে । ৬. খোঁয়ার পুঞ্জ ভেদ করে  
প্রকাশিত অগ্নিশিখা । ৭. শ্রেষ্ঠ দেহ । ৮. শ্রেষ্ঠ দীপ্তি । ৯. শুদ্ধ প্রায়োগ রচ্যমান অর্থাৎ কান্তিমান ।

উর্কীধামে উর্কীশীরে দেহ স্থান এবে,  
উর্কীশ! রাজস্ব দাসী দিবে রাজপদে  
প্রজাভাবে নিত্য যত্নে। কি আর লিখিব?  
বিষের ঔষধ বিধ,—শুনি লোকমুখে।  
মরিতেছিলু, নৃমণি, ছলি কামবিষে,  
তেঁই শাপবিষ বুঝি দিয়াছেন ঋষি,  
কৃপা করি! বিস্ত্র তুমি, দেখ হে ভাবিয়া।  
দেহ আঞ্জা, নরেশ্বর, সুরপুর ছাড়ি  
পড়ি ও রাজীব-পদে, পড়ে বারিধারা  
যথা ছাড়ি মেঘাশ্রয়, সাগর-আশ্রয়ে,—  
নীলানুরাশির সহ মিশিতে আমোদে!  
লিখি এ লিপি বসি মন্দাকিনী-তীরে

নন্দনে। ভূমিষ্ঠভাবে পূজিয়াছি, প্রভু,  
কল্পতরুবরে, কয়ে মনের বাসনা।  
সুপ্রফুল্ল ফুল দেব পড়িয়াছে শিরে!  
বীচিরবে হরপ্রিয়া শ্রবণ-কুহরে  
আমার কহেন—‘তুই হবি ফলবতী।’  
এ সাহসে, মহেয়াস, পাঠাই সকাশে  
পত্রিকা-বাহিকা সখী চারু-চিত্রলেখা।  
থাকিব নিরখি পথ, স্থির-আখি হয়ে  
উত্তরার্থে, পৃথ্বীনাথ!—নিবেদনমিতি!

ইতি শ্রীবীরাঙ্গনাকাব্যে উর্কীশীপত্রিকা নাম  
দশমঃ সর্গঃ

## একাদশ সর্গ

### নীলধ্বজের প্রতি জনা

[মাহেশ্বরী পুরীর যুবরাজ প্রবীর অশ্বমেধ-যজ্ঞাশ্ব ধরিলে,—পার্শ্ব তাহাকে রণে নিহত করেন। রাজা নীলধ্বজ রায় পার্শ্বের সহিত বিবাদপরাম্বুধ হইয়া সন্ধি করাতে, রাজ্ঞী জনা পুত্রশোকে একান্ত কাতর হইয়া এই নিম্নলিখিত পত্রিকাখানি রাজসমীপে প্রেরণ করেন। পাঠকবর্গ মহাভারতীয় অশ্বমেধ পর্ব পাঠ করিলে ইহার সবিশেষ বৃত্তান্ত অবগত হইতে পারিবেন।]

বাজিছে রাজ-তোরণে রণবাদ্য আজি ;  
হেবে অশ্ব ; গর্জে গজ ; উড়িছে আকাশে  
রাজকেতু ; মুহূর্ষঃ হুকারিছে মাতি  
রণমদে রাজসৈন্য ;—কিস্তি কোন্ হেতু ?  
সাজিছ কি, নররাজ, যুঝিতে সদলে—  
প্রবীর পুত্রের মৃত্যু প্রতিবিধিৎসিতে,  
নিবাইতে এ শোকাগ্নি ফাঙ্কনির লোহে ?  
এই তো সাজে তোমারে, ক্ষত্রমণি তুমি,  
মহাবাহু! যাও বেগে গজরাজ যথা  
যমদণ্ডসম শুণ্ড আশ্ফালি নিনাদে।  
টুট কিরীটারি গর্ভ আজি রণস্থলে।  
খণ্ডমুণ্ড তার আন শূল-দণ্ড-শিরে।  
অন্যায় সমরে মূঢ় নাশিল বালকে ;  
নাশ, মহেয়াস, তারে! ভুলিব এ জ্বালা,  
এ বিষম জ্বালা, দেব, ভুলিব সত্বরে।  
জন্মে মৃত্যু ;—বিধাতার এ বিধি জগতে।  
ক্ষত্রকুল-রত্ন পুত্র প্রবীর সুমতি,  
সম্মুখসমরে পড়ি, গেছে স্বর্গধামে,—

কি কাজ বিলাপে, প্রভু ? পাল, মহীপাল,  
ক্ষত্রধর্ম, ক্ষত্রকর্ম সাধ ভুজবলে।

হায়, পাগলিনী জনা! তব সভামাঝে  
নাচিছে নর্তকী আজি, গায়ক গাইছে,  
উথলিছে বীণাধ্বনি। তব সিংহাসনে  
বসিছে পুত্রহা° রিপু—মিত্রোত্তম এবে’  
সেবিছ যতনে তুমি অতিথি-রতনে।—

কি লজ্জা! দুঃখের কথা, হায়, কব কারে ?  
হতজ্ঞান আজি কি হে পুত্রের বিহনে,  
মাহেশ্বরী-পুরীশ্বর নীলধ্বজ রথী ?  
যে দারুণ বিধি, রাজা, আঁধারিলা আজি  
রাজ্য, হরি পুত্রধনে, হরিলা কি তিনি  
জ্ঞান তব ? তা না হলে, কহ মোরে, কেন  
এ পাষণ্ড পাণ্ডুরথী পার্শ্ব তব পুরে  
অতিথি ? কেমনে তুমি, হায়, মিত্রভাবে  
পরশ সে কর, যাহা প্রবীরের লোহে  
লোহিত ? ক্ষত্রিয়ধর্ম এই কি, নৃমণি ?  
কোথা ধনু, কোথা তুণ, কোথা চর্ম, অসি ?

না ভেদি রিপূর বক্ষ তীক্ষ্ণতম শরে  
 রণক্ষেত্রে, মিষ্টালাপে তুষ্টি কি তুমি  
 কর্ণ তার সভাতলে ? কি কহিবে, কহ,  
 যবে দেশ-দেশান্তরে জনরব লবে  
 এ কাহিনী,—কি কহিবে ক্ষত্রপতি যত ?  
 নরনারায়ণ-জ্ঞানে, শুনি পুজিছ  
 পার্থে রাজা, ভক্তিভাবে ;—এ কি আস্তি তব ?  
 হয়, ভোজবালা\* কুস্তী—কে না জানে, তারে,  
 স্বৈরিনী\* ? তনয় তার জারজ অর্জুনে\*  
 (কি লজ্জা), কি গুণে তুমি পূজ, রাজরথি,  
 নরনারায়ণ-জ্ঞানে ? রে দারুণ বিধি,  
 এ কি লীলাখেলা তোর, বুঝিবে কেমনে ?  
 একমাত্র পুত্র দিয়া নিলি পুনঃ তারে  
 অকালে ! আছিল মান,—তাও কি নাশিলি ?  
 নরনারায়ণ পার্থ ? কুলটা যে নারী—  
 বেশ্যা—গর্ভে তার কি হে জনমিলা আসি  
 হৃষীকেশ ? কোন্ শাস্ত্রে, কোন্ বেদে লেখে—  
 কি পুরাণে—এ কাহিনী ? দ্বৈপায়ন ঋষি  
 পাণ্ডব-কীর্তন গান গায়েন সতত ।  
 সত্যবতীসুত ব্যাস বিখ্যাত জগতে !  
 ধীবরী জননী, পিতা ব্রাহ্মণ\* ! করিলা  
 কামকেলি লয়ে কোলে ভ্রাতৃবধুদ্বয়ে  
 ধর্ম্মমতি\* ! কি দেখিয়া, বুঝাও দাসীরে,  
 গ্রাহ্য কর তাঁর কথা, কুলাচার্য্য তিনি  
 কু-কুলের ? তবে যদি অবতীর্ণ ভবে  
 পার্থরূপে পীতাম্বর, কোথা পদ্মালয়া  
 ইন্দ্রিরা ? দ্রৌপদী বুঝি ? আঃ মরি, কি সতী !  
 শাশুড়ীর যোগ্য বধু ! পৌরব-সরসে  
 নলিনী ! অলির সখী, রবির অধীনী,  
 সমীরণ-প্রিয়া ! ধিক্ ! হাসি আসে মুখে,  
 (হেন দুঃখে) ভাবি যদি পাঞ্চালীর কথা ।  
 লোক-মাতা রমা কি হে এ ব্রষ্টা রমণী ?  
 জানি আমি কহে লোক রথীকুল-পতি  
 পার্থ ! মিথ্যা কথা, নাথ ! বিবেচনা কর,  
 সূক্ষ্ম বিবেচক তুমি বিখ্যাত জগতে ।—

ছদ্মবেশে লক্ষ রাজে ছলিল দুঃস্মৃতি  
 স্বয়ম্বরে । যথাসাধ্য কে যুঝিল, কহ,  
 ব্রাহ্মণ ভাবিয়া তারে, কোন্ ক্ষত্ররথী,  
 সে সংগ্রামে ? রাজদলে তেঁই সে জিতিল !  
 দহিল খাণ্ডব দুষ্ট কৃষ্ণের সহায়ে ।  
 শিখণ্ডীর সহকারে কুরুক্ষেত্র রণে  
 পৌরব-গৌরব ভীষ্ম বৃদ্ধ পিতামহে  
 সংহারিল মহাপাপী ! দ্রোণাচার্য্য গুরু,—  
 কি কুছলে নরাধম বধিল তাঁহারে,  
 দেখ স্মরি ? বসুন্ধরা গ্রাসিলা সরোবে  
 রথচক্র যবে, হয় ; যবে ব্রহ্মশাপে  
 বিকল সমরে, মরি, কর্ণ-মহাযশাঃ,  
 নাশিল বর্ষের তাঁরে ।\* কহ মোরে, শুনি,  
 মহারথী-প্রথা কি হে এই, মহারথি ?  
 আনায়-মাঝারে আনি মুগেন্দ্রে কৌশলে  
 বধে ভীরুচিত ব্যাধ ; সে মুগেন্দ্র যবে  
 নাশে রিপু, আক্রমে সে নিজ পরাক্রমে !

কি না তুমি জান রাজা ? কি কব তোমারে  
 জানিয়া শুনিয়া তবে কি ছিলেন ডুল  
 আত্মপ্লাষা\*, মহারথি ? হয় রে কি পাপে,  
 রাজ-শিরোমণি রাজা নীলধ্বজ আজি  
 নতশির,—হে বিধাতঃ !—পার্থের সমীপে ?  
 কোথা বীরদর্প তব ? মানদর্প কোথা ?  
 চণ্ডালের পদধূলি ব্রাহ্মণের ভালে ?  
 কুরঙ্গীর অশ্রুবারি নিবায় কি কভু  
 দাবানলে ? কোকিলের কাকলী-লহরী  
 উচ্চনাদী প্রভঞ্নে নীরবয়ে\*\* কবে ?  
 ভীরুতার সাধনা কি মানে বলবাছ ?

কিন্তু বৃথা এ গঞ্জনা\*\*। গুরুজন তুমি ;  
 পড়িব বিষম পাপে গঞ্জিলে তোমারে ।  
 কুলনারী আমি, নাথ, বিধির বিধানে  
 পরাধীন। নাহি শক্তি মিটাই স্ববলে  
 এ পোড়া মনের বাঙ্কা ! দুরন্ত ফাঙ্কনি  
 (এ কৌণ্ডেয় যোধে ধাতা সৃজিলা নাশিতে  
 বিশ্বসুখ !) নিঃসন্তানা করিল আমারে !

৪. ভোজরাজের কন্যা । ৫. অসতী । ৬. জারজ—উপপতির পুত্র । অর্জুন ইন্দ্রের ঔরসে জন্মেছিলেন । ৭. কৃষ্ণদ্বৈপায়ন  
 ব্যাসের জন্মবৃত্তান্ত প্রসঙ্গ । ৮. ধৃতরাষ্ট্র, পাণ্ডু প্রভৃতির জন্মবৃত্তান্ত প্রসঙ্গ । ৯. অর্জুনের প্রতি জনার ব্যাসোক্তি । অর্জুনের  
 সমুদয় গৌরবকীর্তিও কলঙ্কপূর্ণ এই জনার ইঙ্গিত । ১০. আত্মঅহংকার । ১১. নীরব করে । ১২. তিরস্কার ।



তুমি পতি, ভাগ্যদোষে বাম মম প্রতি  
তুমি ! কোন্ সাধে প্রাণ ধরি ধরাধামে ?  
হায় রে, এ জনাকীর্ণ ভবস্থল আজি  
বিজন জনার পক্ষে । এ পোড়া ললাটে  
লিখিলা বিধাতা যাহা, ফলিল তা কালে ।—

হা প্রবীর ! এই হেতু ধরিনু কি তোরে,  
দশ মাস দশ দিন নানা যত্ন সয়ে,  
এ উদরে ? কোন্ জন্মে, কোন্ পাপে পাপী  
তোর কাছে অভাগিনী, তাই দিলি বাছা,  
এ তাপ ? আশার লতা তাই রে ছিড়িলি ?  
হা পুত্র ! শোধিলি কি রে তুই এইরূপে,  
মাতৃধার ? এই কি রে ছিল তেরা মনে ?—

কেন বৃথা, পোড়া আঁধি, বরষিস্<sup>৩</sup> আজি  
বারিধারা ? রে অবোধ, কে মুছিবে তোরে ?  
কেন বা জ্বলিস্, মনঃ ? কে জুড়াবে আজি  
বাক্য-সুধারসে তোরে ? পাণ্ডবের শরে

খণ্ড শিরোমণি তোর ; বিবরে<sup>৩</sup> লুকায়ে,  
কাঁদি খেদে, মর, অরে মণিহারা ফণি ।—

যাও চলি, মহাবল, যাও কুরুপুরে  
নব মিত্র পার্থ সহ ! মহাযাত্রা করি  
চলিল অভাগা জনা পুত্রের উদ্দেশে !  
ক্ষত্র-কুলবালা আমি ; ক্ষত্র-কুল বধু ;  
কেমনে এ অপমান সব ধৈর্য্য ধরি ?  
ছাড়িব এ পোড়া প্রাণ জাহ্নবীর জলে ;  
দেখিব বিস্মৃতি যদি কৃতান্তনগরে  
লভি অস্তে ! যাচি চির বিদায় ও পদে !  
ফিরি যবে রাজপুরে প্রবেশিবে আসি,  
নরেশ্বর, “কোথা জনা ?” বলি ডাক যদি,  
উত্তরিবে প্রতিধ্বনি “কোথা জনা ?” বলি !

ইতি শ্রীবীরাক্ষনাকাব্যে জনাপত্রিকা নাম  
একাদশঃ সর্গঃ ।